



ყოველკვირეული საპოლიტიკო, სამეცნიერო და სალიტ. გაზეთი

№ 9 20 ივლისი 1908 წ. ფასი 10 კ.

შინაარსი: დიდებული საუკუნე.—ნაცია ისტორიის გზაზე, **ონ.—სა.**—სხვა და სხვა ამბები ჩვენსა და რუსეთში.—ოსმალეთი.—სპარსეთი.—პირველ სათათბიროს დებუტატთა ბასამართლება.—ადამის ძეო! (ლექსი) **ა. გერასიმისძესი.**—დედები (მოთხრობა) **ან. ერისთავ-ხოშტარიასი.**—ავსტრიის მომხმარებელ საზოგადოებათა კონგრესი, **მ. მაგლობლიშვილისა.**—ჟურნალ-გაზეთები—დან.—სახლვა—გარეთ.—ბანცხადება.

დიდებული საუკუნე.

„ველარ ბანუძლებს ქვეყანა ძველი
განახლებისა ბრიზალის ქროლას“.
ი. ჭავჭავაძე.

მიუხედავად ყოველივე სიღუპისა, დებეშათა სა-
ფერტოებს მაინც თითქმის ყოველ დღე მოაქვთ ერთი
მეორე უფრო საყურადღებო, უფრო სენსაციონური
და გულ-გონების შემოკავი ამბები. ამ ამბებს ადამიანი
უნებურათ უკარნახებს: „ვინ იფიქრებდა! ვინ იფიქრებ-
და!...“ მართლაც და, ჯერ კიდევ გუშინ, ყველას ეგონა,
რომ აღმოსავლეთი, და განსაკუთრებით სპარსეთი
და ოსმალეთი, წილხდომილი ქვეყნები იყვნენ დესპოტი-
ზმისა, ტირანიისა და რომ აქ თითქმის სამარადისოთ
დაესადგურებინა განუქცრეტელ წყვდიადსა და უსაზღვრო
მონობა-შეაფერებლობას. მაგრამ სხვათაგან განსაჯა მეოცე
საუკუნემ. ამან ერთბაშით სამართლიანობის ცეცხლი გა-
უჩინა ძველ ქვეყნებს. წყვდიადი უკვე ირღვევა, ითრ-
გუნება, ჰორიზონტი დასერილია განთიადის მომასწავე-
ბელი სხივებით და მალე აღმოსავლეთით აინთება დიადი
ლამბარი თავისუფლებისა!

საქმე დაიწყო რუსეთმა, რომელსაც მუდამ საბედის-
წეროთ მოქუშული და გაუქუღმართებული პირი უჩან-

და. პირველი სხივები აქ, მართალია, ძალიან მაცდური
გამოდგა და დღეს იმპერიის ხალხნი, თითქოს დაჭრილი
ლომი სიმწარით თათებს იკენეტავსო, თავისი ტკივილე-
ბით განმარტოებულან; მარა ივინი მისცემიან შინაგან
(პსიხიურ) მუშაობას და ბეჯითად ზრდიან იმედსა და
დაუშრეტელ წყურვილს უხვათ აინაზღაურონ დანაკლისი.
ეს კი თავდებია ნიშანში ამოღებულ საქმის განხორცი-
ელებისა. რუსეთის რევოლიუციის ტალღები შორით-
შორამდე გადიტყორცნა. იგი მისწვდა თვით ჩინეთის
კედლებს, და ეხლა ამ უმოძრაობის სიმბოლოდან, „ზე-
ციურ იმპერიიდან“ დაჟინებით მოდის ხმები დიდ რევო-
ლიუციონურ მოძრაობის მოახლოებისა. რუსეთს ზედ
მიჰყვა სპარსეთი. აქ თითქმის ერთის დაკვრითვე შემო-
ღებულ იქმნა საკმაოთ ლიბერალური კონსტიტუცია და
პარლამენტარიზმი. მართალია ყველაფერი ეს მალე ბარ-
ბაროსულის სიმკაცრით ფეხ-ქვეშ იქმნა გათელილი სპარ-
სეთის—და არა მარტო სპარსეთის—ბნელი ძალების მიერ;
მაგრამ სპარსეთის მთელი ვითარება და საქმეთა მსვლე-
ლობა გვარწმუნებს, რომ რეაქცია უეჭველათ დამარცხ-
დება და გამარჯვებული რევოლიუციონური ხალხი სპარ-
სეთისა ახლათ აგებულ მეჯლისის სასახლის თავზე კვლავ
ამაყურათ აღმართავს თავისუფლების დროშას.

სპარსეთში დღეს რეაქცია და რევოლუცია სამკედრო-სასიცოცხლო ბრძოლის გამწარებით ეკვეთებიან ერთმანეთს, და აი ახლა კიდევ ოსმალეთში იქეპა რევოლუციამ. ერთი უკანასკნელი დეპეშა იუწყება, რომ სტამბოლის ქუჩებზე ბაირაღებით გამოსულა მრავალი ათასი სული ხალხი და ჰაერსა სძრავს ყიჟინით: „გაუმარჯოს თავისუფლებას, გაუმარჯოს კონსტიტუციას!..“ „წითელი სულთანი“ თურმე შეძრწოლდა თავის სასახლეში რევოლუციის პირველივე ხმების გაგონებაზე, მაგრამ მან ვერც კი მოასწრო დაესისინა „ხალხის სისხლში ამოვახრჩობ რევოლუციასო“, რომ იძულებული გახდა ასე „ჩაეხმატებია“ „ჩემი საყვარელი შვილებისათვის (ე. ი. ოტომანის ხალხისათვის) მიბოძებია თავისუფლება!“ დეპეშები სარწმუნო წყაროებიდან იტყობინებიან, რომ სულთანი კონსტიტუციის გამოცხადებაზე დათანხმდა მხოლოდ მას შემდეგ, როცა ბოსფორისა და დარდანელის სიმაგრეთა კომანდირებმა მის (სულთნის) ბრძანებაზე—მზათ ყოფილიყვენ აჯანყებულ ჯარების წინააღმდეგ გამოსასვლელათ—უპასუხეს: „მომზადებას საქირთ არა ვცნობთ, რადგან მტერს არა ვხედავთ“. რევოლუციურ მოძრაობაში თურმე მონაწილეობას იღებენ ჯარი, აფიცრობა და ბევრი გავლენიანი პირები. ასე რომ ოსმალეთი—ეს უკიდურეს გათახსირება-გახრწილების სიმბოლო—ჩქარის ნაბიჯით უახლოვდება კონსტიტუციონალურ წყობილებას, სახალხო მართვა-გამგეობას.

მაგრამ დიდი შეცდომა იქნებოდა გეგფიქრნა, ვითომ აქ დასახელებულ ქვეყნებს დღე-დღეზე ელოდეს ახალ პოლიტიკურ წეს-წყობილების განმტკიცება, ვითომ აქ დღე-დღეზე შეიძლებოდეს უზრუნველ-ყოფილი გახდეს პოლიტიკური თავისუფლება. არა, საუკუნოების განმავლობაში მონობის მძიმე უღელ-ქვეშ მოხრილი ხალხი ერთბაშად ვერა მაგრდება წელში, საუკუნოებით ნატუქსი გონება ერთბაშად ვერ იმსქვალება ახალ პოლიტიკურ ცხოვრების სათანადო ცოდნით და თავის საკუთარ ვინაობის შეგნებით. მაშ ჯერ კიდევ საკმაო ხანი გაივლის, ვიდრე დაწყებულ რევოლუციებს ბოლო მიეცემოდეს და პოლიტიკური თავისუფლება ჯეროვანათ განმტკიცდებოდეს. მაგრამ ერთი რამ არის ყოველსავე ექვს გარეშე. სახელდობრ ის, რომ უკვე ერთი დიდი გამარჯვება საბოლოოდ მოპოვებულია. ყველა აქ დასახელებულ ქვეყნებში უკვე გადადგმულია პირველი, მარა უდიდესი და უძნელესი ნაბიჯი, რომლის შემდეგ უკან გამოზრუნება ყოვლად შეუძლებელია. ეხლანდელი სახალხო მოძრაობა სრულებითაც არ ჰგავს საშუალო საუკუნოების ხალხის აჯანყებას. დღეს ხალხის რისხვა მიმართულია არა ამა თუ იმ მანე პირებზე თუ ჯალათებზე, არამედ მთელ ძველ რეჟიმის წინააღმდეგ. ხალხის მასსა ესწრაფის არა ახალ პირების გაბატონებას, არამედ ახალ პოლიტიკურ და მოქალაქობრივ ცხოვრებას, თვით-მმართველობას. აი სწორედ აქ არის წინდი სახალხო გამარჯვებისა, ეს გარემოებაა თავდები, რომ „ველარ განუძლებს ქვეყანა ძველი განახლებისა გრიგალის ქრილას“,

„და დაიმსხვრევა იგი ბორკილი შემფერხებელი კაცთა ცხოვრების“...

რუსეთისა და მთელ აღმოსავლეთის გაწმენდა ძველი რეჟიმის დარჯაკებისაგან თვით დასავლეთსაც ფართო გზას მისცემს და უძლიერეს ენერგიას შემატებს სოციალურ მოძრაობისათვის და ასე, დასავლეთ-აღმოსავლეთი, მთელი მშრომელი კაცობრიობა, ძმურის სიმებით გაღანასკუნნი და საერთო ფერხულში ჩაბმულნი მედგარის ნაბიჯით წავლენ წინ დიად სოციალურ პრობლემის გადასაწყვეტათ, შრომის სუფევის დასამყარებლათ. მეოცე საუკუნემ დიადი ამბებით გახსნა მსვლელობა „და ამ ზვიადმა საუკუნემ უნდა შვას იგი შრომის სუფევა!..“

III. ნაცია ისტორიის გზაზე.

3.

ბ. სოციალიზმის ხანაში.

კაუცკის შეხედულებით, ნაციის განვითარება სწარმოებს იმავე გზით და იმავე სახით, როგორც—ქვეყნის ეკონომიური განვითარება. როგორც აქ პატარა საკუთრება, პატარა წარმოება იცლაპება დიდი საკუთრებისა და დიდი წარმოებისაგან, ისევე პატარა ნაციები ჩაიყლაპება დიდი და ძლიერი ნაციებისაგან. ასეთი ბედი—თუმცა ფრთხილი სიტყვებით—კაუცკიმ ამ 15-დე წლის წინათ, უწინასწარმეტყველა, სხვათა შორის, ჩეხების ნაციას. იგი ამ სამწუხარო პერსპექტივის განქვრეტას ჩეხებს უაღვილებდა ასეთი სიტყვებით: „მაგრამ ჩეხებს შეუძლიანთ ინუგეშონ თავი, რადგან ასეთივე ბედი ელის იმათზე უფრო დიდ ნაციებსაც.“*) მარა ამ დროს განმავლობაში ჩეხების ნაცია არანც თუ უკან არ წასულა, არ დასუსტებულა და მას არ გამოუჩენია ტენდენცია ძლიერ ნაციაში (ნემცებში) გასაღესათ, არამედ, პირიქით, იგი უფრო გაღონიერდა, უფრო ამაღლდა და კვლავ საოცარის სისწრაფით ვითარდება. ამ ფაქტის წინაშე, რასაკვირველია, თვითონ კაუცკიც თავს იხრის, მაგრამ იგი მაინც ისევ თავის აზრზე დგას. ამ ცოტა ხანში გამოსულ თავის ახალ ნაწარმოებში-ნაციონალურ საკითხის შესახებ—კაუცკი ხელუხლებლათ სტოვებს თავის მთავარ შეხედულებას (l' idée metresse).

იმის დავარათ—სწერს იგი—როგორც ხალხთა შორის ვითარდება ეკონომიური ურთიერთობანი, ნაციონალური კულტურა აშკარათ იღებს ინტერნაციონალურ ხასიათს. უკვე დღეს აღარ არსებობს წმინდა ნაციონალური კულტურა. კულტურის მხრივ დღეს უკვე მთელი ქვეყნიერება იყოფა სამ დიდ სამფლობელოთ; ესენია: ქრისტიანული კულტურული სამფლობელო, სადაც შედის თითქმის 600 მილიონი წევრი, ისლამური—250 მილ. წევრი, ბრამინული და მისი მონათესავე ბუდისტური—თითქმის 700 მილიონი წევრი; თვითოველი კულ-

*) იხ. Национальность нашего времени, გვ. 41. ან ქართული გამოცემა „ჩვენი დროის ეროვნება“ გვ. 62-3.

ტურული სამფლობელო შეიცავს მრავალ სხვა და სხვა ნაციებსა და ენებს. მაგრამ, რასაკვირველია, აქ არ ჩერდება განვითარება. კაპიტალისტური წეს-რიგი წარმოებისა ყველგან აღწევს გაბატონებას „ამ ნიადაგზე ეს სამი დიდი კულტურული სამფლობელო ხდება ეკონომიურათ ერთიანი სამფლობელო, რომელსაც მოვება საერთო კულტურა; ნაციათა და კულტურულ სამფლობელოთა შორის საზღვრები სულ უფრო და უფრო ქრება. აქედან უფრო ცხოველდება საჭიროება არსებობდეს ერთიანი საქვეყნიერებო ენა.“²⁾ დღეს ჩვენა გვაქვს სამი საქვეყნიერებო ენა—ფრანგული, გერმანული და ინგლისური. (საერთო აზრია, რომ ვისაც უნდა ნამდვილათ განათლებული ადამიანი იყოს, მან უეჭველათ ერთ-ერთი აქ დასახლებული ენა მაინც უნდა იცოდეს). მომავალში შესაძლებელია ამ სამ ენას კიდევ მეოთხეც მიემატოს, მაგალითათ რუსული ენა. მარა ეს იქნება დროებითი მოვლენა. ბოლოს და ბოლოს გამარჯვება უნდა დარჩეს ერთ-ერთს, ე. ი. ერთი საქვეყნიერებო ენა გადიქცევა უნივერსალურ, მსოფლიო ენათ. კაუკკი ფიქრობს, რომ ასეთი უპირატესობა წილათ ხედება ინგლისურ ენას, რადგან ამ ენაზე მოლაპარაკეთა რიცხვი ყველაზე უფრო მეტათ იზრდება. ასე მაგ. გასულ საუკუნის დასაწყისში საქვეყნიერებო ენებზე მოლაპარაკეთა რიცხვი იყო: ფრანგულზე—დაახლოვებით 30 მილიონი, ამდენივე გერმანულზე; ინგლისურზე—20 მილიონზე ცოტა მეტი; დღეს კი ითვლება: ფრანგულათ მოლაპარაკე—40 მილიონზე ცოტა მეტი, გერმანულათ—70 მილიონზე მეტი, ხოლო ინგლისურ ენაზე უკვე 125 მილიონი ლაპარაკობს. მსოფლიო ენის წარმოშობა განხორციელდება, რასაკვირველია, მხოლოთ სოციალიზმის დროს. მხოლოთ სოციალიზმის დროს შეიძლება ხალხის მასსა შეისწავლოს ერთ-ერთი საქვეყნიერებო ენა და მით მაშინ უსარგებლო გახდება ყველა სხვა ენები. ჯერ გაქრება პატარა ნაციების სამშობლო ენები, მერე მოზრდილ, მერე უფრო დიდ ნაციების ენები და ასე ბოლომდის, ვიდრე მთელი კაცობრიობა ალაპარაკდებოდეს მხოლოთ ერთ ენაზე.

ასეთია კაუკკის შეხედულება. აქ ბევრი რამ არის მართალი, მარა დედა აზრი კი შემცდარი არის. კაუკკი სამართლიანათ აღნიშნავს ნაციათა გაერთიანების ტენდენციას, მარა იგი თითქმის სრულიად ივიწყებს, ან სათანადო ანგარიშს არ უწყევს მეორე ტენდენციას, რომელიც პირველის მოპირდაპირე და უარყოფელი მიმდინარეობაა; ჩვენ ვამბობთ კაცობრიობის ნაციებათ დიფერენციაციის (გამიჯვნა-განაწილების) ტენდენციაზე. თვითონ პირველსაც სრულებითაც არა აქვს ის ხასიათი, რომელიც კაუკკის წარმოდგენია. ნამდვილათ სწორეთ „გაერთიანების“ ტენდენცია აწარმოებს ნაციათა დეფერენციაციას. აფხსნათ.

კაპიტალიზმის განვითარებამ, რასაკვირველია, თან მოიტანა ის ფრიად თვალსაჩინო შედეგი, რომ სხვა და სხვა ქვეყნები და ნაციები ერთმანეთზე გადაება და

მკიდროთ შეკავშირდა. დღეს ძნელათ იპოვება ისეთი ქვეყანა, რომ ყველა თავის მოთხოვნილებებს თვითონვე, საკუთარის ნაწარმოებით იკმაყოფილებდეს. ზოგიერთი მათგანი—და საკმაოთ განვითარებული და მდიდარი ქვეყნები—უცხოეთიდან იღებენ არა მარტო დასამუშავებელ, ნედლ მასალას, ანუ მხოლოთ ზოგიერთ წრეებისასთვის საჭირო საგნებს, არამედ აგრეთვე ისეთ საგნებსაც, რომელიც ემსახურება ადამიანთა მიუცილებელ საჭიროებათა დაკმაყოფილებას, როგორც მაგ. ბური, ხორციული და სხვა სურსათი-სანოვადე. ასეთ პირობებში უერთმანეთობა, ცხადია, სრულიად აუტენელი იქნება. ყველამ იცის, თუ რა აურ-ზაური და დრტვინვა გამოიწვია ევროპის სახელმწიფოებში ამ ორი წლის წინათ რუსეთში მომხდარ პოლიტიკურ არეულობამ და საყოველთაო გაფიცებამ. ევროპას ამ შემთხვევაში, თქმა არ უნდა, რუსეთის ხალხთა ტანჯვა-ვაება კი არ აწუხებდა, რუსეთის თვით კონსტიტუციისა და პოლიტიკურ თავისუფლების ბედ-იღბალი კი არ აფიქრებდა, არამედ მხოლოთ თავის საკუთარ ჯიბის ინტერესები, დაბანდებულ კაპიტალების განადღება, ჯეროვან მოგება-საგრებლის ზედშეკეცვით. დიხ, დღეს იმდენათ უკვე მკიდროა ქვეყნების ეკონომიური ურთი-ერთშორისი დამოკიდებულება, რომ, უკეთუ რაიმე მიზეზით—მაგ. ევროპის საყოველთაო ომიანობით—საერთაშორისო მიმოსვლა-ურთიერთობა შეწყდებოდა, ეს, აუცილებლათ, გამოიწვევდა მრავალ წარმოებათა მთელ დარგების სრულ გაკატრებას, აუარებელ მუშა ხალხის ულუკმაპუროთ დატოვებას, საზარელ სიმშლიობას; ერთი სიტყვით საერთაშორისო ურთიერთობის შეჩერება ქვეყნიერებას თავს დაატებდა ისეთ საშინელ კატასტროფებს, რომლის მსგავსი ჯერ არ ახსოვს კაცობრიობას. ეკონომიურ ასეთ ურთიერთ შორის დამოკიდებულებას ბუნებრივის აუცილებლობით თანა სდევს დამოკიდებულება ცხოვრების აგრეთვე დანარჩენ მხარეებშიც, კულტურულ, იდეურ სფერაშიაც. და რადგან კაპიტალისტური საზოგადოება დაფუძნებულია კონკურენციაზე, მეტოქეობა-ქიშპობაზე, ცხადია, აქ, ბრძოლის ასპარეზზე ერთნი მარცხდებიან, მეორენი გამარჯვებულნი რჩებიან. ნაცია, უკეთესათ შეიარაღებული, უკეთეს პირობებში მყოფი, თან და თან უფრო იზრდება და ვითარდება; იგი სწრაფათ ძლიერდება როგორც ნივთიერათ; ისე კულტურულათ. ენა, რომელზედაც ის ლაპარაკობს, აუცილებელი იარაღი ხდება ცხოვრების გზის გასაყფათ და ეს ყოველ ასპარეზზე, როგორც ვაქრობა-მრეწველობაში, ისე ხელოვნებასა და მეცნიერებაში. ამიტომაც ძლიერი ნაციის ენა მოდათ შემოდის პატარა ნაციაში. და თუ ეს უკანასკნელი პოლიტიკურათ დამონებულია, ცხადია, მისთვის გაბატონებულ ნაციის ენას უფრო კიდევ მეტი მნიშვნელობა მიეცემა, ვინაიდან სახელმწიფო ენის უკოდინართათვის დახშული იქნება თითქმის ყველა საზოგადოებრივი და სახელმწიფო დაწესებულებათა კარი. ასეთ პირობებში, რასაკვირველია, მამები თავის ბავშვებს აკენიდანვე ჩასჩიხინებენ: „შვილო, თუ გინდა

²⁾ nation. und Internationalität გვ. 13.

კაცი გახდეს, ისწავლე ჩვენი „მამა-ბატონების“ ენა“. სამშობლო ენების მნიშვნელობა თანდათან ეცემა და მათზე ლაპარაკი სათაკილოც კი ხდება. აქედან კაუკუი დასკვნის; „მათი (სამშობლო ენების) ხმარება უფრო და უფრო შეიზღუდება, ეს ენები თანდათან იქცევიან მართლ, „შინ სახმარ ნივთათ“ და ბოლოს აქაც დაიქვრენ იმავე ადგილს, როგორც უჭირავს საგვარეულოს ძველისძველ ავეჯს, რომელსაც აფასებენ და სათუთათ უფროხილდებიან, მაგრამ არაფითარ პრაქტიკულ მნიშვნელობას კი აღარ აძლევენ.“³⁾

მაგრამ, რასაც აქ კაუკუი მომავალი დროისთვის ამბობს, ის დაწინაურებულ ქვეყნებში დღეს უკვე წარსულს ეკუთვნის. იქ პატარა და დაზარალებული ნაციონალური ენები იმდენად დაკარგული ჰქონდათ პრაქტიკული მნიშვნელობა, რომ სრულადაა გაქრობის პირათ იყვნენ მისული, მაგრამ დღეს უკვე სურათი ერთიანად შეცვლილია. საქმე ის არის, რომ თუ კაპიტალისტურათ განვითარებულ ძლიერმა ნაციებმა პირველ ხანებში დაიმონავეს და საწველ ფურათ გაიხადეს პატარა სუსტი და უკან ჩამორჩენილი ნაციები, შემდეგში მათ ამ უკანასკნელთ თვითონვე—თავისდა უნებურათ, რასაკვირველია—მისცეს იარაღი გასანთავისუფლებლათ, საკუთარ ფეხზე დასადგომათ და საკუთარი გზით განსავითარებლათ. მაგ. ავსტრია-უნგრეთში, კაპიტალიზმმა—შეიძლება ითქვას—მკვდრით აღადგინა იქ ჩამწყვდელი პატარა ნაციები. დიხ, პატარა და სუსტი ნაციები ბოლოს თვითონვე შესანიშნავათ ანვითარებენ კაპიტალისტურ წარმოებას, და მტკიცეთაც მაგრდებიან ამ ნიადაგზე. ამ ერის ბურჟუაზია უცხო კონკურენციის თავიდან მოსაშორებლათ წინ იმდღვარებს ნაციონალურ ენას; ასპარეზზე გამოსული მუშა ხალხიც ანვითარებს იმავე ენას, რადგან ეს იმისთვის კლასიურ ბრძოლის აუცილებელი იარაღია. რაკი ხალხის მასსა ემბება ქვეყნის პოლიტიკურ ცხოვრებაში, ამ მასის ენაც სათანადო ადგილს პოულობს და ბოლოს ბატონობასაც აღწევს როგორც ლიტერატურაში, ისე სკოლისა, სასამართლოს და საზოგადოებრივ თუ სახელმწიფო დაწესებულებებში. აქედან ინტელიგენციისათვისაც, თავისუფალ პროფესიის ხალხისათვისაც, როგორც არიან ჟურნალისტები, მასწავლებლები, ვეკილები, ექიმები და სხ. ყველა ამათთვის სამშობლო ენა ხდება არსებობის მიუცილებელ საშუალებათ ამასთანავე ერთათ იცვლება საზოგადოებრივი აზრის სამშობლო ენის შესახებ. ამ ენის აბუჩათ ადდება ეხლა უკვე სამარცხვინოთ არის აღიარებული. ეხლა მამა თავის ბავშვს ასე შთააგონებს: „შვილო, თუ გინდა კაცი გახდე, კარგათ ისწავლე სამშობლო ენა“. უცხო, გაბატონებულ ნაციის ანუ საქვეყნიერებო ენა იქცევა, აგრე წოდებულ, „საზოგადოების“ შინ სახმარ ენათ. იგი იხმარება კერძო ადამიანთა მიზნებისათვის, იმათ ვაქრობა-მრეწველობის თუ ხელოვნება-მეცნიერების მოთხოვნილებათა დასაკმაყოფილებლათ; იგივეა ენა ლაყობა-ლაზღანდარობისა,

არშეყოებისა თუ სხვა რაიმე კერძოობისა. ხოლო გარეთ, საზოგადოებაში, ლიტერატურაში თუ საქირო კრებებში, ერთი სიტყვით, ყოველ საზოგადოებრივ საქმეში უკვე გამეფებულია სამშობლო, ნაციონალური ენები. ეხლა ის, ვინც წარა-მართ ლაპარაკობს უცხო, გაბატონებულ ნაციის ენაზე, ნასწავლ-განათლებული და ზრდილი ყმაწვილი კი აღარ არის, არამედ, იგია უსულ-გულთ, ქარაფშუტა ვიგინდარა. ხოლო სამშობლო ენაზე წმინდა, რიგიანი ლაპარაკი ეხლა უკვე ნიშანია იმისი, რომ ეს ადამიანი ამოვლებულა და განბანილა თანამედროვე სოციალ-პოლიტიკურ ბრძოლის ტალღებში.

ყველა ზემო ნათქვამიდან, რასაკვირველია, ის არ გამოიმდინარეობს, ვითომ დროს განმავლობაში იკარგებოდეს გაბატონებულ ნაციათა ენების და საქვეყნიერებო ენების მნიშვნელობა. ჩვენ მხოლოდ იმას აღვნიშნავთ, რომ ამ ენებთან ერთათ იზრდება და ფართოვდება აგრეთვე სამშობლო, ნაციონალურ ენების მნიშვნელობა, და ასე ხდება იმის დაკვალოთ, როგორც იზრდება და ვითარდება დემოკრატია. და რადგან გამაჯვება ეკუთვნის ამ უკანასკნელს, ცხადია, სოციალისტურ ხანაში ნაციები შევლენ დიდათ განვითარებულ სამშობლო ენებით აღჭურვილნი. როგორი იქნება შემდეგი მსვლელობა?

სოციალისტურ საზოგადოებაში, თუმცა თვითოეული ნაცია სრული ბატონ-პატრონი იქნება თავის თავისა, მარა ექვს გარეშეა, რომ იგი ამისთვის არ მიეცემა განცალკევებულ და კარ-ჩაკეტილ ცხოვრებას; ეს წინააღმდეგი იქნებოდა მთელ ტენიკისა და კულტურის განვითარებისა. სოციალისტური საზოგადოება მხოლოდ განაგრძობს, განავითარებს იმ პროცესს, რომელიც დღესვე კაპიტალისტურ პირობებშივე სწარმოებს და ნაცია უფრო მჭიდრო, განუყრელი ძაფებით შეუკავშირდება მთელ კაცობრიობას, როგორც ეკონომიურათ, ისე კულტურულათ. მაშასადამე მრავალ ენიანობა საერთოთ წინ მსვლელობის შემაფერხებელი გარემოება იქნება და ერთი მსოფლიო ენის მიღება კი მიუცილებელი საჭიროება. და რადგან ბუნებრივათ, თავის-თავათ არ იბადება მსოფლიო ენა (აწ არსებულ საქვეყნიერებო ენების რიცხვს—ფრანგულს, გერმანულს, ინგლისურს—არა თუ არ აკლდება, კიდევ ემატება ახალი ენები. ხოლო საქვეყნიერო ენების გვერდით ვითარდებიან აგრეთვე ნაციონალური ენები). ცხადია სოციალისტური საზოგადოებანი იძულებული გახდებიან ცნობიერათ ჩაერიონ საკითხის გადაწყვეტაში. მაგრამ შეუწყნარებელი შეცდომა იქნებოდა გვეფიქრნა, ვითომ ერთ მშვენიერ დღეს სოციალისტურ საზოგადოებათა საერთაშორისო კონგრესი გამოიტანდეს დეკრეტს, რომლის ძალითაც ერთ-ერთი ნაციის ენა (ის მაგ. რომლის მცოდნე აღმოჩნდება კაცობრიობის უმრავლესობა) მიღებულ იქნებოდეს მსოფლიო და საყოველთაო ენათ, ხოლო დანარჩენთა სამშობლო ენების ხმარება კი აიკრძალებოდეს. ასეთი დეკრეტი უეჭველათ გამოიწვევდა ხალხთა კანონიერ ნაციონალური თავმოყვარეობის აღშფოთებას, რაკი სათავეშივე

³⁾ Национальность нашего времени გვ. 42.

ჩაკლავდა საქმის განხორციელებას. ჩვენის აზრით, მსოფლიო ენათ მიღებულ იქმნება არა ამა თუ იმ ნაციის ენა, არამედ, ასე ვთქვათ ნეიტრალური ენა, ე. ი. რომელიც არ ეკუთვნის არც ერთ ნაციას. ასეთია მაგ. უკვე დღეს არსებული, საერთაშორისო ენათ წოდებული „ესპერანტო“. საგულისხმოა, რომ ამ ენაზე მოლაპარაკეთა რიცხვი უკვე დღესვე, შეუმჩნევლათ, მაგრამ შეუჩერებლათ, მრავლდება ყველა სახელმწიფოებსა და ყველა ნაციებში.⁴⁾ საგულისხმოა ისიც, რომ გერმანიის სოც.-დემოკრატიის ზოგიერთ წრეებში უკვე დღესვე აზრათ აქვთ აღძრან საკითხი იმის შესახებ, რომ ეს ენა მიღებულ იქმნას სოციალისტურ პარტიების საერთაშორისო კონგრესებისთვის, რადგან სამ-ოთხ ენაზე თათბირი ძალიან აფერხებს კონგრესების მუშაობას. ზოგიერთი დიპლომატები და პოლიტიკოსებიც ასევე ფიქრობენ გამოიყენონ „ესპერანტო“. მაგრამ ექვს გარეშეა, რომ ეს ენა მსოფლიო ენათ გადაიქცევა—თუ კი ასეთ „ბედნიერ ვარსკვლავზე“ დაბადებული—მხოლოდ სოციალიზმის განხორციელების შემდეგ. სოციალისტურ საზოგადოებათა მსოფლიო ენა, გარდა წმინდა საერთაშორისო დანიშნულებისა, შესარულებს აგრეთვე სამშობლო ენის ზოგიერთს—და მხოლოდ ზოგიერთ—ფუნქციებს. ასე მაგ. თუ დღეს რაიმე ახალი აღმოჩენა ან განსაკუთრებულია შესანიშნავი ნაწარმოები ხელოვნებისა თუ მეცნიერების სფერაში აუცილებლათ ითარგმნება ნაციონალურ ენებზე, მაშინ ეს თარგმნა საჭირო აღარ იქნება, რადგან ყველა განსაკუთრებულია შესანიშნავი ნაწარმოები თვით ავტორებისაგანვე დაწერილ იქნება მსოფლიო ენაზე და ეს კი ყველა ნაციების ყველა ადამიანებს ეცოდინებათ. სამშობლო ენათა ხმარების სფერა, რასაკვირველია, შემცირდება. ვერც ერთი ნაციონალური ენა ვეღარ გასცილდება თვით ნაციის საზღვრებს, ე. ი. იმ ადამიანთა წრეს, ვისთვისაც იგი შეადგენს სამშობლო ენას. ეს კვლავ იქცევა ჩვეულებრივ, შინ სახმარ ენათ. სამშობლო ენა იქნება უმთავრესათ ადამიანთა ესტეტიკურ მოთხოვნების, მრავალფეროვანება-სხვა-და-სხვაობისადმი მისწრაფების დამაკმაყოფილებელი. მსოფლიო ენა კი იქნება უმთავრესათ საშუალება წინმსვლელობა-განვითარებისათვის.

ამ გვარათ, მომავალი, სოციალისტური კაცობრიობა ილაპარაკებს მრავალ ენაზე, ხოლო თვითეულ ნაციას კი ექმნება მხოლოდ ორი ენა: მსოფლიო და სამშობლო ენა.

მაგრამ წარმოვიდგინოთ, რომ ოდესმე სამშობლო ენები სრულიად მოისპო კიდევ და მთელ კაცობრიობას ერთათ-ერთი მსოფლიო ენაღა შერჩა. ასეთი პერსპექტივის განხორციელება მაინც კიდევ არა ნიშნავს ნაციათა მოსპობას და მთელ კაცობრიობის ერთ ნაციათ გადაქცევას. მკითხველმა უკვე იცის, რომ, ჩვენის შეხედულებით, ენა

სრულებითაც არ შეადგენს ნაციის არსებას; ნაციის გამოქმედია ნაციონალური კულტურა, რომლის მხოლოდ ერთ ნატეხს წარმოადგენს ნაციონალური ენა, მარა კაუტკის აზრით როგორც უკვე აღვნიშნეთ — სოციალიზმის დროს კაცობრიობის კულტურასაც აღარ ექნება ნაციონალური სანახაობა, და ეს პროცესი ნაციათა კულტურულ გაერთიანებისა უკვე დღეიდანვე, კაპიტალისტურ პირობებში თვალსაჩინოთ სწარმოებს. ნამდვილათ კი როგორ არის ამ მხრივ საქმე?

ნიციათა კულტურული ურთი-ერთობა რომ ფაქტია, ეს ყველამ იცის და სოციალიზმის დროს რომ ეს ურთი-ერთობა კიდევ უფრო მეტათ განვითარდება, ესეც აშკარა უნდა იყოს ყველასათვის. მაგრამ სახელდობრ რას იძენს ერთი ნაცია მეორისაგან და ან რითი განსხვავდება ერთის კულტურა მეორისაგან? როგორც ცალკე ადამიანს შეუძლიან სთქვას თავის თავზე: *Homo sum, et nihil humani a me alienum puto* (მე ადამიანი ვარ და არაფერი, რაც კი ადამიანობას ეხება, არ არის ჩემთვის უცხო), სწორეთ ასევე მთელ ნაციასაც შეუძლიან სთქვას თავის თავზე, რომ არაფერი, რაც კი სხვა ნაციებს მოეპოვებათ, არ არის მისთვის უცხო ან მიუწოდებელი, განვითარების შესაფერ საფეხურზე. ყველა ნაციები ერთმანეთს ჰგვანან განვითარების ერთსა და იმავე საფეხურზე. სოციალიზმის დროს ნაციები უეჭველია ერთი მეორეს გაუთანასწოროდებიან კულტურული დონით; **არსებითად** ყველგან იქნება ერთი და იგივე საზოგადოებრივი წეს-წყობილება, ერთი და იგივე ტენიკა, მეცნიერება, ხელოვნება, ფილოსოფია; ნაციები ერთმანეთს გაუთანასწოროდებიან კულტურის **შინაარსით**. მაგრამ როგორც ერთი ნაციის ცალკე ადამიანთა გათანასწორობა სწავლა-ცოდნით და აღზრდა-განათლებით არა ნიშნავს მათს ინდივიდუალობის მოსპობას, სწორეთ ასევე ნაციათა გათანასწორობა კულტურის მატერიალურ შინაარსის მხრივ არ მოასწავებს მათ სხვა და სხვაობის მოსპობას. ეს აზრი შეიძლება ნათელ-ვყოთ წარსულის მაგალითით. გეცოდინებათ, რომ მეთერთმეტე საუკუნის დამლევდინ, ვიღრე მონგოლების შემოსევამდე, მეცამეტე საუკუნის პირველ მეოთხედამდე, ქართველობამ განიცადა კულტურულ განვითარების განსაკუთრებული ხანა. მრავალ უცხო ენების ცოდნა და ამ ენებზე ლიტერატურის შესწავლა აუცილებელი პირობა იყო ქართულ სწავლა-აღზრდისა. უცხო ენებზე ლაპარაკობენ და სწერენ მეფეთა სასახლეებშიაც. ასე მეფე დიმიტრის, დავითის შვილს, მიწერ-მოწერა ჰქონდა არაბულ და სირიულ ენებზე; თფილისში იმყოფებოდა უმაღლესი სასწავლებელი; აქვე, ჩვენი ქვეყნის სატახტო ქალაქში, თავს იყრიდენ სხვა და სხვა ქვეყნებისა და ნაციების სწავლულნი და პოეტები;⁵⁾ ერთი სიტყვით, საქართველო მაშინ განიცდიდა უცხო ნაციების კულტურის ძლიერ ზე-გავლენას. მაგრამ სწორეთ ამ ხანაში ქართველთა ნაციონალური სახე უფრო მკაფიოთ ჩამოყალიბდა, სწორეთ ამ დროსვე ჩვენი ნაციონალური

⁴⁾ ამას წინათ მოსული ცნობით ამ ენაზე გადაუთარგმნიათ ბ-ნ სუმბათაშვილის ცნობილი პიესა „ლალატი“ და მალე ითამაშებენ პარიზის ერთ-ერთ სცენაზე.

⁵⁾ იხ. სხვათა შორის პროფ. მარის „Исторія Грузии“.


კულტურა განვითარების შეუდარებელ სიმაღლემდე ავიდა. ამ ხანასვე ეკუთვნის შოთა რუსთაველის „ვეფხისტყაოსანი“, რომლის სიუჟეტი, სპარსულიდან არის აღებული და რომელიც ერთი უძვირფასესი განძია ქართულ ნაციონალურ კულტურისა. რათ მოხდა ასე? რატომ პირიქით არ მიმქალდა ჩვენი ნაციონალური სახე და არ გავილესენით სხვა ნაციებში? სწორეთ იმიტომ, რომ ქართველობა მაშინ უკვე გარკვეულ ნაციონალურ კულტურის ღონეზე იდგა და ყველაფერს, რასაც კი სხვა ნაციებისაგან იღებდა, რასაც კი სხვათაგან სწავლობდა, ყველაფერს იგი თავის ნაციონალურ ფორმებში აყალიბებდა, ყველაფერს თავის ნაციონალურ ბეჭედს ასვამდა. ასევე იქნება შემდეგშიც. ასევე იქნება მუდამ.)

სოციალიზმის დროს რამდენიც უფრო მეტი განვითარებული იქნება ნაცია, იგი იმდენათ უფრო მტკიცე თავისებურობის ბეჭედს დასცავს ყველაფერს, რასაც კი სხვა ნაციებისაგან შეიძენს. ამასთანავე, რაკი ნაციონალური კულტურა ნაციის თვითმედი ადამიანის საერთო კუთვნილება იქნება, ცხადია, რომ ყოველი ახალი აზრი თუ რაიმე მიმდინარეობა, ვიდრე მიღებულ იქმნებოდეს რომელიმე ნაციისაგან, უმალ უნდა შეისისხლოს ბოლომდე თვითმედი ადამიანისაგან. დაბოლოს ამას შედეგათ ის მოჰყვება, რომ ნაციისგან მიღებული ახალი შენაძენი, თქმა არ უნდა, დიდათ განსხვავებული დარჩება დედანისაგან. ეს კი იმას ნიშნავს, რომ რამდენიც წინ წავა კაცობრიობა განვითარების გზაზე, იმდენათ იგი უფრო მტკიცეთ და გარკვევით იქნება დანაწილებული სხვა და სხვა ნაციებათ.

ამგვარათ სოციალიზმი კი არ სპობს ნაციებს, არამედ ანვითარებს მათ უმაღლეს წერტილამდე იგი ნაციის მთელ ვინაობას აქსოვებს თვითმედი მის წევრის არსებაში; ნაციის მთელი ნიჭიერება-გენიოსობა ვრცელდება თვითმედი ადამიანზე. და მთელ კაცობრიობის შემოქმედ ძალებსაც ესხნება შეუდარებელი ასპარეზი უფართოეს და უმაღლეს პოზიციებზე.

სოციალიზმის განსახორციელებლათ კი ისტორიულათ მოწოდებულია საერთაშორისო პროლეტარიატი. ხოლო ამ უკანასკნელის გოლიათურ ბრძოლას განთავისუფლებისათვის წინ ეღობება ძლიერი დაბრკოლება, რომლის თავიდან მოშორება მიუცილებელი პირობაა საბოლოო გამარჯვებისა. ამ დაბრკოლებას შეიცავს ნაციონალური საკითხი თვისი სპეციფიკური სახით. როდის, რა პირობებში იბადება ეს საკითხი და როგორია მისი შინაარსი, ამაზე შემდეგ წერილში.

ონ.



*) ვიგულისხმებთ, რასაკვირველია, დროის იმ მანძილს, სადა მდინაე კი შეიძლება განსჯერიტოს თანამედროვე ადამიანთა გონების თვალში. ხოლო ნამდვილათ მუდმივი სიცოცხლე კი არც ჩვენს დედა-მამის მოთხოვნა და არც მზე და მთვარეს.

ს ს თ ე ნ ი ქ ა ლ ი ა მ ბ ე ზ ი

ჩვენში.

— 11 ივლისს ქუთაისის გენ.-გუბ. განკარგულთ ბით შორაპნინ მაზრაში დააპატიმრეს ექიმი ივანე გომირთელი. ის სტრაჟნიკების თანხლებით ქუთაისის საპატიმროში გაგზავნეს.

— როგორც გაზ. „ზაკ.“-ს შეუტყვია, თფილისის მაზრის საგარეჯოს, გიორგიწმინდის, მანაგის, ნინოწმინდის და პატარძელის საზოგადოებებისათვის ნამესტნიკის ბრძანებით, უნდა დაინიშნოს მთავრობის მამასახლისი, რომელსაც სოფლებმა უნდა აძლიონ თვეში 40 მ. საგარეჯოს საზოგადოებაში იდგება დარაჯთა რაზმი, რომელიც შესდგება ათი ცხენიან სტრაჟნიკისაგან; თითო სტრაჟნიკი მიიღებს ჯამაგირათ სამ-სამ თუმანს. სოფლებმა უნდა შეიძინონ მათთვის 11 ბერდანი და 500 პატრონა, სოფლებმავე უნდა მისცენ მათ ბინა. ეს ხარჯი, ბინის ქირისა და იარაღის ფასის გარდა, შეადგენს ყოველ წლივ 4080 მან.

— გაზ. „ამირანმა“ ლეიპციგიდან მიიღო შემდეგი დეპეშა: „სტუდენტი ემუხვარი შიმშილითა კვდება. აღარავითარი საშუალება არა გვაქვს დავებმარათ. მიეშველენით და დაიხსენით სიკვდილისაგან. მიეცით ღონისძიება სამშობლოში დაბრუნებისა. აღრესი: ლეიპციგი ღამაშიდეს.“

— ამ უკანასკნელ დეპეშაში თფილისში მასსიური ჩხრეკა-დაპატიმრებაა. დაიჭირეს რამდენიმე ტრამვაიზე მოსამსახურე პირი. ჩხრეკამენ ღვინის სარდაფებს, გამვლელ-გამომვლელთ, სახელოსნოებს, ბინებს და სხვა.

— როგორც დეპეშები გადმოგვცემენ ცარიცნისა, ასტრახანსა და მათ მახლობელ ქალაქებში გაჩნდა ხოლერა. თფილისის ქალაქის გამგეობა შეუდგა ეხლავე საქირო ღონისძიების მიღებას ამ სენთან საბრძოლველათ.

— ამ მოკლე ხანში ფ. გოგიაიშვილის რედაქტორობით განახლდება ყოველ კვირულ გაზ. „ივერიის“ გამოცემა.

— რკინის გზის მთავარ სახელოსნოებიდან დაითხოვეს 250 მუშა; მათ წინადადება მისცეს დაუყონებლივ გავიდენ თფილისიდან.

— „გოლ. კ.“ გადმოგვცემს, რომ ერთ ერთ თფილისის საპატიმროში მოუწამლათ ჯარის კაცები. გარდაიცვალა 8 კაცი. დანარჩენების მორჩენის იმედი არა აქვთ. ვინ ჩაიღინა ეს საქმე ჯერ-ჯერობით გამოურკვეველია.

— 23 ივლისს თფ. სამოსამართლო პალატის სესია განიხილავს ქუთაისში „სვანეთის რესპუბლიკის“ საქმეს. პასუხის გებაში მიცემულია 37 კაცი.

დიდი-ჯიხაიშიდან გაწერენ: „ადგილობრივმა ექიმმა ვ. ლორთქიფანიძემ იერიში მიიტანა ყველა ქუთაისში მოსამსახურე პირებზე და ჯერჯერობით, ყოველათ უმიზეზოთ, დაითხოვა, წვრილი კოლშევილის პა-

ტრონი ხელზე მოსამსახურე დარსაველიძე, დარსაველიძე თითქმის წელიწად-ნახევარია, რაც ქსენონში მსახურებს იმავე ექიმთან და ღვინდის კეთილსინდისიერათ და ერთგულათ ასრულებდა თავის მოვალეობას. ამ ბოლო დროს ექიმმა, როცა მას ერთი მესაიდუმლე მოსამსახურე დააშორეს, ათვალწუნა ყველა დანარჩენი მოსამსახურეები და ჯერჯერობით მისი მსხვერპლი გახდა ხსენებული დარსაველიძე“.

რესეტი.

— სიკვდილით დასაჯეს: სევასტოპოლში.—ერთი (ლიტვიჩენკო, რომელმაც ესროლა გენ. ღუმბაძეს ყუმბარა); ოდესაში—ორი (კაპიტანი გლინსკი და გლეხი ნიკიტინი სევასტოპოლის აჯანყების მონაწილენი), მინსკში—ერთი, ეკატერინოსლავში—სამი, რიგაში—ორი, ვილნოში—ერთი. ოდესაში—ორი, სარატოვში—ერთი.

— სიკვდილით დასაჯა გადუწყვიტეს: პეტერბურგში —ერთს, რეველში—ოთხს, სარატოვში—სამს, კიევი—რვას, ვილნოში—ორს, პროსკუროვში—ერთს, სამარაში—ორს, ვარშავაში—სამს, ხარკოვში—ოთხს, ეკატერინოსლავში—ორს. („რეჩი“ № 159—165).

— რიგაში სამხედრო სამართალში მისცეს ოცი კაცი, რომელთაც აბრალებენ პროპაგანდის გაწევას ჯარში.

— პიროგოვის ექიმთა საზოგადოების გამგეობამ შარშან მხმართა რუსეთის ყველა საგუბერნიო და სამაზრო ერობებს თხოვნით შეეტყობინებიათ მისთვის სიშშილისა და უქმელობისაგან დავთრებში აღნიშნულ ავთმყოფთა რიცხვი. გამგეობას მიუღია პასუხი ვიატკის, ნიჟეგოროდის, რიაზანის, კოსტრომის, ვორონეჟის, ორლოვის, უფიმის, ტამბოვის და სიმბირსკის გუბერნიებიდან. მიღებული ცნობები ეხება 1903—7 წლ. ეს ცნობები რასაკვირელია, სრული არაა და არც ყველა მაზრებშია შეკრებილი. აღნიშნულ 9 გუბერნიაში უქმელობის გამო გამხდარა ავთ სახადისა, სურავანდისა, სისხისა და ჰვეკურისაგან 1903 წ. 10,498, 1904 წ.—78,054, 1905 წ.—89,651, 1906 წ.—115,679 კაცი. ყველა გუბერნიებში სკარბობს სახადით ავთმყოფთა რიცხვი რაც შეეხება 1907 წ., პირველ სამ თვეს შეტანილია დავთარში სახადით ავადმყოფი—24,800, სურავანდით—39,318 კაცი; სულ სიმშილისაგან ავადმყოფი ჩაწერილა სამი თვის განმავლობაში 70,520 კ.

— „რ. ს.“ ატყობინებენ, რომ მწვავდება დამოკიდებულება კირგიზებსა და რუს გადასახლებულთა შორის. ამ ცოტა ხანში მოსვლიათ მათ შეტაკება უბრალო საქმის გამო ტურგაის საზაზრო ადგილზე. დაპირილია ორი კირგიზი, ნაცემია სამი რუსი. კირგიზებმა თავიანთ სოფლის რუსი მასწავლებელი კოლდეროვი გაიტაცეს მინდორში, დასკრეს მუცელში სამ ადგილას, მერე მოაბეს ცხენს კუდზე და მანამდის არბენეს, სანამ სიკვდილმა არ მოუღო ბოლო მის ტანჯვა-წვალებას.

— დაჯარიმეს გაზეთები: „რუსკია ვედომოსტი“

3000 მან., რადგანაც მასში მოთავსებული იყო ლ. ნ. ტოლსტოის წერილი სიკვდილის დასჯის წინააღმდეგ; „გლას ნაროდა“ (ელისავეტგრადში)—1000 მან., „სარატოვსკი ლისტოკი“—200 მან.; „იუენია ვედომოსტის“ ნომრებს კონსფიკაცია უყვეს (მოთავსებული იყო ლ. ნ. ტოლსტოის წერილი „არ შემძლიან გაჩუმება“).

— „სმოლენსკის ლისტოკის“ ყოფილი რედაქტორი გადასახლეს ორი წლის ვადით ვოლოგდის გუბერნიაში.

— იუზოვკაში, რიკოვის მახლობელ მაღაროებში, კიდევ აფეთქდა გაზი; დაიღუპა სამი მუშა, სამი დაშავებულია.

— იაროსლავში ღუნაევის თუთუნის ფაბრიკაში აფეთქდა ქვაბი. მოკლულია კაჩეგარი, 8 მუშა მძიმეთაა დაშავებული.

— კალიშევისა და ტურეკის შუა ესროლეს ყუმბარა საფოსტა ფურგუნს. მეეტლე და ორი სალდათი მოკლეს. ერთი ჯარისკაცთაგანი დაიჭრა, ფულის წადება ვერ მოასწრეს.

— რომენის მაზრაში გაძირცეს სმელიანის ფოშტის განყოფილება; ფოშტის განყოფილების უფროსი ღ მისი ცოლი ძალიანაა ნაცემი.

— ყოფილ დეპუტატ კირიენკოს ბორკილები გაუყარეს და ეტაფით გაგზავნეს ციმბირისკენ.

— კინეშში (კოსტრომის გუბ.) აღმოუჩენიათ ს.-დ.-ბის ორგანიზაცია და მათი საიდუმლო სტამბა. დააპატიმრეს 21 კაცი. იპოვეს შრიფტი, გექტოგრაფი და აუარებელი არალეგარული ლიტერატურა.

— ასტრახანსა, კარიცინსა და მათ მახლობელ ქალაქებში გაჩნდა ხორველა.

— კრემენჩუგში დააპატიმრეს და სამართალში მისცეს ნედოგარის ნაწილის ჯრიადნიკი, რომელმაც გლეხ ქურბის ქოხში გააუპატიურა სახლის პატრონის ოთხის წლის ქალი.

— სოფ. ულიანოკაში (ალექსანდროვის მაზრა) აღძრულია საქმე ადგილობრივ მღვდლის ლ. სოკოლოვის წინააღმდეგ, რომელსაც აბრალებენ ახალგაზდა ქალის, მედავითნის მოსამსახურის, გაუპატიურებას. გამომძიებელთან გამოცხადებულა მეორე ქალი და განუცხადებია, რომ ხსენებულ მამამ მეც მოსამსახურესთანა საქმე დამმართაო.

— კიევის ნიკოლსკის გარეთ უბნის „მოკავშირეთ“, რიცხვით 40 კაცმა, ღამის 11 ს. მორთეს ყვირილი „ჟიდები, ჩამტერიეს კავშირის საჩაიეს ფანჯრები და დაუწყეს ცემა-ტყევა ებრაელებს. მერე დაიჭირეს „ცეპნოი“ ხიდი, რომელიც აერთებს გარეთ-უბანს კიევთან, დაუწყეს ჩხრეკა და სინჯვა გამვლელ-გამომვლელთ, როგორც ურიებს, ისე რუსებსაც. ბევრი გამოეთხოვა თავის ფულებს. პოლიცია ამ ხნის განმავლობაში არსადა სჩანდა.

— 6 ივლისს უმაღლესათ დამტკიცებულ იქნა სახელმწიფოს შემოსავალ გასავალის ნუსხა, შედგენილი სახელმწიფოს საბჭოს და სახელმწიფოს ღუმის მიერ. აღნიშნულ ნუსხაში 1908 წლ. ნააგარიშევია შემოსავალი: ჩვეულებრივი—2.386.945,498 მან. და განსა-

კუთრებული რესურსების—194.457.670 მან., სულ—2.581.403.168 მან. სახელმწიფო გასაღალი-ჩვეულებრივი—2.312.251.090 მ., და განსაკუთრებული—269.151.078 მან., სულ—2.581.403.168 მან., ჩვეულებრივი შემოსავალი გასაღალს სკარბობს 74.694.408 მან.

— 2 ივლისს, ვორონეჟის საპატიმროში, სისხლის სამართალში მიცემულ ტუსალებმა, რომელთაც გადაწყვეტილი ჰქონდათ კატორგა სხვა და სხვა ვადით, დაამტკიცეს თავის კამერის კარები და მიესივნენ კარიდორში მყოფ ზედამხედველ დმიტრიევს; მოუკუმეს პირი, ჩამოხსნეს რევოლვერი, გახადეს ფორმის ტანისამოსი, წათრეკეს და კლოზეტში ჩააგდეს. შემდეგ გაემართნენ მეორე ზედამხედველ ბორზენკოვისაკენ. ტუსალებს უნდოდათ ამასაც ისე მოქცეოდნენ, როგორც დმიტრიევს, მარა ბორზენკოვი აღმოჩნდა ფიზიკურათ ძლიერი და არ დანებდა მათ. ბორზენკოვმა მოახერხა იმათ ხელიდან განთავისუფლება, რის შემდეგ გამოვარდა გარეთ და ალიაქოთი ასტეხა, ტუსალებმა რამდენჯერმე ესროლეს რევოლვერი, მაგრამ ვერც ერთი ვერ მოარტყეს.

ტუსალები გაიქცნენ კანტორაში და დასწყვიტეს ტელეფონის მავთულები. ამ ხანებში საპატიმროს ეზოში მოგროვდნენ დანარჩენი ზედამხედველები, მათ მიეშველა ერთი როტა სალდათი, ყაზახები, სტრაჟნიკები და სხვა. რამდენიმე მათგანი შევიდა კარიდორში, სადაც კლოზეტის ფიცრის კედელს იქით ელოდებოდნენ მათ კატორგელები. უკანასკნელთ დაიწყეს რევოლვერებიდან სროლა, რაზედაც სროლითვე უპასუხეს. როდესაც შესწყვიტეს სროლა ანათეს ლამფები (სროლა მოხდა ბნელ კორიდორში), 4 პატიმარი ნახეს მკვდარი, მათ შორის კოლმიკოვი, რომელსაც ეცვა ზედამხედველ დმიტრიევის ფორმის ტანისამოსი. ერთი ტუსალთაგანი დაქრილია. სროლის შემდეგ კლოზეტიდან ამოიყვანეს ზედამხედველი დმიტრიევი, რომელიც აღმოჩნდა დაქრილი და გაგზავნენ, წითელი ჯვრის საავთმყოფოში. გაჩხრიკეს ყველა კამერები. ერთში იპოვეს ორი რევოლვერი, ჩალა, ოთხი ფორთოხლის ოდენა ყუმბარა, და სხვა და სხვა იარაღები. დახოცილნი გაგზავნეს საეროზო საავთმყოფოში. ყველა ისინი ახალგაზდებია 25—30 წლ. ოთხივენი კარგათ იყვნენ შეიარაღებულნი (ი. კ.)

ს ს ა ზ ს ე თ ი .

— **სპარსეთი.** ზეი (ჯულფიდან). მთავრობისა და რევოლუციონერების შეტაკების შემდეგ მოძრაობა შესწყდა. შეტაკების დროს მოკვდა 8 რევოლუციონერი, დაიჭირეს ადგილობრივი საიდუმლო კომიტეტი თავისი არხივით. რეპრესიები გრძელდება. დაურდგომელი ელემენტები გაიხვეწნენ. ქოლქში მყუდროებაა.

— **სალმას.** 9 ივლისს, სალმასის ხოცსა და მაქის მმართველთა დაინიშნა მაქინის ხანი იქბალუს-სალტანე. იმის ბძანებით დაიჭირეს ხალხის მოძრაობის მეთაურები, რომელნიც საშინლათ დასაჯეს. შემამულეები ძალიან მადლიერი არიან შაჰის გამარჯვებით, მხოლოდ დანარჩენი მცხოვრები ურუ შურიითაა გაჟღენთილი, მაგრამ დემონსტრაციის გამართვას ვერ ახერხებენ.

— **თეირანი.** „რუსკოე სლოვოს“, „რეჩისა“ „რუსკია ვედომოსტის“ ორი კორესპონდენტი, რომელნიც იმყოფებიან თეირანში გუშინ შაჰიმ კერძოდ მიიღო. შაჰიმ დაარწმუნა ისინი, რომ მას სურს დაიცოს კონსტიტუციონალური წყობილება სპარსეთში, მოიწვიოს ახალი მეჯლისი და ნება მისცეს გადაიღონ მისი და მისი მემკვიდრის ფოტოგრაფიული სურათი.

— თეირანიდან გაქცეული და ჰამადანში დაქრული ცნობილი რევოლუციის მქადაგებელი სეიდ-ჯამალი გარდაიცვალა საპყრობილეში.

— **თავრიზი.** ეხლა გადაჭრით შეიძლება ითქვას, რომ თავრიზის პატრონი არიან რევოლუციონერები. შემდეგ საშინელი ძარცვა-მკვლელობისა, რომლის დროს მთელი უბნები დაცალიერდა და ამოწყდა, თავი იჩინა მოტყუილებამ. ცნობილ რევოლუციონერისა და ენჯუმენის წევრის ჰაჯი-მეჰტის სახელით მისდის მდიდარ სპარსელებსა და რუსეთის ქვეშევრდომთ ფულის თხოვნის წერილები. ამ მუქარის წერილებს რეაქცია აწერს რევოლუციონერებს, მაგრამ სხვა წყაროები კი ამბობს ამის წინააღმდეგ...

ზარბაზნებისა და თოფების სროლა გრძელდება დრო გამოშვებით. 14 ივლისს მეჩეთში კიდევ იკრიბებოდა ხალხი. ეწეოდნენ აგიტაციას რეაქციის მომხრეთა წინააღმდეგ სამღვთო ომის დასაწყებათ. ქალაქის ახლომახლო გზებით ყოვლად შეუძლებელია მიმოსვლა, მეზავრებს სცარცავენ და ჰკლავენ. ამ დღეებში სათარხანს მოუვიდა მაშველი რაზმი 150 კცისაგან შემდგარი. ეს რაზმი ქოლქში შევიდა ნაწილ-ნაწილათ 3—4 კაცი, ეხლა მთელი უბნები ბარიკადებითაა მოცული. რეაქცია არაა კმაყოფილი თავის მოქმედებით. რაზმი-ხანს და სხვებს, როგორც არ უნდა დამალონ, აღარ აქვთ წინანდელი რწმენა თავის ძალისა.

ო ს მ ა ლ ე თ ი .

ახალგაზდა ოსმალთა დეკლარაცია. გაზეთებში გამოქვეყნებულია ოტტომანის იმპერიის ოპოზიციონერ პარტიების სიეზდის დეკლარაცია. ეს სიეზდი მოხდა წარსულ წელს დეკემბერში. მასში მონაწილეობას იღებდნენ ოსმალეთის კავშირის და პროგრესის კომიტეტი, სომახის რევოლუციონერი ფედერაცია (დაშნაკტუნი), ოტომანის კერძო ინიციატივის დეცენტრალიზაციის და კონსტიტუციის ლიგა, ებრაელთა ეგვიპტის კომიტეტი, რედაქცია „Khilapet“ (არაბების ორგანო), რედაქცია „Razmi“, რედაქცია „Haïmenik“ და კომიტეტი Ahdi Osmani.

დეკლარაცია იწყება სასტიკი გაკიცხვით როგორც აბდულ-ჰამიდის რეჟიმის ისე თვით სულთანისა, რომელმაც აიკლო, გააღატაკა, შეარცხვინა და ტერიტორიალურათ შეამცირა იმპერია.

შემდეგ დეკლარაცია აღნიშნავს, რომ თუ სულთანის რეჟიმი გაგრძელდა, მაშინ იმპერია დაირღვევა და მას ხელს ჩავლებენ სხვა სახელმწიფოები.

მარტო რეჟიმის დაუყოვნებლივ შეცვლას შეუძლია შეაფერხოს კატასტროფა და იმპერიის დანაწილება.

სიეზდი ამიტომ მოითხოვს:

- 1) სულთან აბდულ-ჰამიდის გადაყენებას;
- 2) ეხლანდელ რეჟიმის რადიკალურათ შეცვლას;
- 3) წარმომადგენლობითი მართვა-გამგეობის შემოღებას.

ამ მიზნების მისაღწევით სიეზდი აცხადებს შემდეგ საშუალებებს:

- 1) შეიარაღებული წინააღმდეგობა მთავრობის ყოველ განკარგულებას;
- 2) წინააღმდეგობის გაწევა პოლიტიკური და ეკონომიური გაფიცვების სახით; გაფიცვა ჩინოვნიკების, პოლიციის და სხვა.
- 3) გადასახადებზე უარის თქმა;
- 4) პროპაგანდა ჯარში;
- 5) საერთო აჯანყება და სხვა და სხვა საშუალებები პირობების დავარათ ნაკარნახევი.

ოსმალეთის კონსტიტუცია. ოსმალეთში აღდგენილ იქმნა 1876 წლის კონსტიტუცია, რომელიც არ იყო კანონით გაუქმებული დღემდე, თუმცა საქმით კი ერთ წელზე ნაკლები იარსება. აი კონსტიტუციის შინაარსი:

ოტომანის იმპერიის ერთიანობა და განუყოფლობა, სულთანის უპასუხისმგებლობა და ხელშეუხებლობა; სულთანის ისეთივე უფლება აქვს, როგორიც აქვთ ევროპის კონსტიტუციონალურ ხელმწიფეებს; პირად თავისუფლების უზრუნველყოფა; სახელმწიფო სარწმუნოებათ გამოცხადებულია ისლამი, მაგრამ ყველა ცნობილ სარწმუნოებას უფლება ეძლევა შეასრულოს თავის კულტი (სარწმუნოებრივი წესი) თავისუფლათ; ბეჰედისა და კრების თავისუფლება; პეტციის უფლება; იმპერიის ყველა ქვეყნად მთავრობის თანასწორობა კანონის წინაშე. პარლამენტი შეესდგება ორი პალატისაგან: სენატისა და დეპუტატთა პალატისაგან; ორივე პალატა ყოველ წელს პირველ ნოემბერს უნდა იქმნეს მოწვეული. თვით დეპუტატებს, თითო კაცს ყოველ 100 ათას მცხოვრებისაგან, ირჩევენ ფარული კენჭის ყრით 4 წლის ვადით. თუ პალატა დათხოვნილ იქმნა, ახლათ არჩეული პალატა მოწვეულ უნდა იქმნას არა უგვიანეს 6 თვისა დათხოვნის შემდეგ.

მოსამართლეებს ვერავინ გადააყენებს; სასამართლოებში ხალხის თანდასწრებით არჩევენ საქმეს. ბიუჯეტი შეტანილ უნდა იქმნას პარლამენტის სესიის დაწყების უმაღლ და მტკიცდება მხოლოდ ერთი წლის ვადით. საკონტროლო პალატა, რომლის წევრებს ვერავინ გადააყენებს, ყოველ წელს წარუდგენს დეპუტატთა პალატას ბიუჯეტის ასრულების შესახებ ანგარიშს, ყოველ სამ თვეში კი სულთანს წარუდგენს მოხსენებას ფინანსთა მდგომარეობის შესახებ. შემოღებულია ადგილობრივი თვითმმართველობა და ადგილობრივ საქმეებს განაგებენ ხალხის მიერ არჩეული ადგილობრივი საბჭოები. პირველ დაწყებითი სწავლა სავალდებულოა ყველასათვის.

სტამბოლი. გუშინ ნაშუადღევს ილდიზის წინ გაიმართა უზარ-მაზარი დემონსტრაცია. დემონსტრაციაში ათიათასობით იღებდნენ მონაწილეობას; დემონსტრატები ატარებდნენ დროშებს შემდეგი ზენაწერით: „გაუმარჯოს თავისუფლებას, გაუმარჯოს კონსტიტუციას! კაცებით და ოსმალის ქალებით გაკედლილი იყო ქუჩები. ისინი აღფრთოვანებულნი საღამოს აძლევდნენ დემონსტრანტებს. ცენზურის მოსპობამ და უკანასკნელმა პოლიტიკურმა ამბებმა გამოიწვია ოსმალეთის პრესის აღორძინება. გა-

ზეთების ტირაჟი აღწევს წარმოუდგენელ რიცხვს წასულთან შედარებით. ოსმალეთის პრესა აღფრთოვანებული ეგებება ცენზურისა და საიდუმლო პოლიციის გაუქმებას; არჩევენ დაუყონებლივ და ენერგიულათ შეუდგებიან ყოველგან. პარლამენტი გაიხსნება 1 ნოემბერს.

— ანატოლიდან იტყობინებიან, რომ ხალხი აღფრთოვანებულია; სულთანის ირადეს კითხულობენ ქუჩასა, მოედნებსა და ყავა-ხანებში. ოსმალთ, ბერძენი, სომეხი, ებრაელი ერთმანეთს ულოცავენ, მზიარულობენ და პატივობენ. ხალხი ემზადება არჩევნებისათვის; პარლამენტის გახსნა მოხდება დიდის ზეიმით. პარლამენტის გახსნიდან დაიწყება მოჩუხჩუხე ცხოვრება. ხალხის საქრობა უკვე აღნიშნულია: საყოველთაო პირველ დაწყებითი განათლება, უმთავრეს ქალაქებში მაღალი სასწავლებლების გახსნა, რკინის გზების გაყვანა, ვაჭრობა. მრეწველობის განვითარება, მანქანების ექსპლუატაცია და სხვა.

— სტამბოლი. გაზეთები იტყობინებიან, რომ გუშინ, როდესაც პოლიტიკურ-ადმინისტრატულ პატიმრებს ანთავისუფლებდნენ ცენტრალური საპრობილიდან სისხლის სამართლის პატიმრებმაც მოითხოვეს განთავისუფლება და ხელს უშლიდნენ პოლიტიკურების გასვლას, დიდი ვეზირის ჩარევით საქმე მშვიდობიანათ გადავდა. სისხლის ღვრა არ მომხდარა.

— განთავისუფლეს 166 კაცი პოლიტიკური პატიმარი, ამათ რიცხვში სომეხიც ურევია.



ზღვის პირას მთლიანად, ქანდაკება, უირარდისა.

ზირველ სახელ. ღუმის დეპუტატ. გასამართლება. *)

30 ივნისს პეტერბურგის სამოსამართლო პალატამ გაარჩია 1-ლი სახელმწიფო ღუმის ცხრა დეპუტატის საქმე, რომელნიც, სხვა და სხვა მიზეზების გამო დეკემბრის პროცესის დროს ვიბორგის მოწოდების შედეგისა და ხელის მოწერისათვის, გამოჰყვეს ცალკე ჯგუფათ.

სხდომა დაიწყო დღისით 11¹/₂ საათზე. ცხრა ბრალდებულთაგან გამოცხადდა შვიდი: პროფ. ლ. ი. პეტრაჟიკი, ა. დ. აივაზოვი და ე. გ. შოლპი (კადეტებია), ი. დ. ბიჩკოვი და ს. ტ. ტუმბუსოვი (შრომის ჯგუფის წევრები); ი. გ. გომართელი და ა. ი. სმირნოვი (ს.-დ.). უკანასკნელი 8 თვეზე მეტია, რაც კოსტრომის გუბერნატორის განკარგულებით ციხეში იყო დაპატიმრებული. სასამართლოში მოიყვანეს ის საპატიმროდან.

ორი, ერმოლაევი და შუვალოვი, ავადმყოფობის გამო არ გამოცხადდნენ. ამათი საქმე ცალკე გამოჰყვეს.

ბრალდებულთ იცავდნენ გრუზენბერგი, ვეისმანი, ბულატი, გუსევიჩი და ოესიანნიკოვი.

წაკითხულ იქნა საბრალდებულო აქტი, საიდანაც სჩანს, რომ არც ერთი არ უარყოფს მოწოდებაზე ხელის მოწერას; მის გავრცელებაზე კი ყველანი უარს აცხადებენ.

აქტის წაკითხვის შემდეგ თავმჯდომარის შეკითხვაზე — სცნობენ თუ არა ბრალდებულნი თავის-თავს დამნაშავეთ — ყველანი უარყოფითი უპასუხებენ; ბიჩკოვმა ამასთანავე დაუმატა, რომ ის ასრულებდა მის გამგზავნელ ხალხის ნებას და სურვილს.

ამის შემდეგ გამოჰკითხეს — მოწმეებს. მოწმე სტახოვიჩი აცხადებს, რომ როდესაც ის მივიდა ვიბორგში სახელმწიფო ღუმის ერთი ჯგუფის დავალებით, საერთო სხდომა უკვე გათავებული იყო. დეპუტატები ფრაქციებათ იყვნენ დაყოფილი და, უმთავრესათ, სჯა-ბაასი ჰქონდათ მოწოდების მეორე ნახევარზე. კადეტების უმრავლესობა მეორე ნახევარის წინააღმდეგი იყო. სხვათა შორის იმის წინააღმდეგ ილაპარაკა პროფ. ლ. ი. პეტრაჟიკიმ. მოხდა საერთო კრება, რომელზედაც თავ. დოღგორუკოვმა გამოაცხადა ფინლიანდიის გენ.-გუბ. მიწერილობა, თუ ვინცოცაა დეპუტატები არ წავლენ ვიბორგიდან, ის შემოიღებს ჭლაქში სამხედრო წესებსო. ვინავერმა მისცა წინადადება კრებას წასულიყვენ შვეციაში. პეტრუნკევიჩი არჩევდა მიეღო კრებას მოწოდება, მხოლოდ მისი საბოლოო რედაქცია მიენდო განსაკუთრებულ კომიტეტისთვის. უკანასკნელი წინადადება მიღებულ იქნა, თუმცა პეტრაჟიკიმ და სხვებმა ილაპარაკეს კიდევ მოწოდების მეორე ნახევარის წინააღმდეგ.

უმრავლესობამ მიიღო მოწოდება მეორე ნახევრით. მას ხელი მოაწერა ბევრმა იმათგანმა, ვინც მის წინააღმდეგი იყო.

ვეისმანის შეკითხვაზე მოწმემ განაცხადა, რომ ვიბორგში მოწოდების გავრცელების შესახებ მას არაფერი

გაუგია. დანარჩენ შეკითხვებიდან გამოიკვია, რომ მოწოდების პროექტის განხილვა კიდევ უნდოდათ, მაგრამ მათ ეს ვერ მოახერხეს.

სტახოვიჩის გამოკითხვის შემდეგ, ნაფ. ვექ. ბულატი აცხადებს ტრუდოვიკების მხრივ, რომ მათ გადაწყვეტილი მოწმეების გამოკითხვაში და სამოსამართლო გამოძიებაში მონაწილეობა არ მიიღონ. ტრუდოვიკებისავე ფრაქციის სახელით ბრალდებული ტუმბუსოვი აცხადებს, რომ ყველამ მათ (50 კაც.) მოაწერეს ხელი მოწოდებას, რადგან სცნობდნენ მას მიზნის შესაფერისათ. თუ ზოგიერთი ტრუდოვიკები პროტესტს აცხადებდნენ, ეს მხოლოდ იმიტომ, რომ ტონი მოწოდებისა და მისგან აღიარებული საშუალებები მიჩნდათ ძალიან სუსტათ. დანარჩენში ბრალდებული-ტრუდოვიკები უერთდებიან თავის ამხანაგების ნათქვამს დეკემბრის პროცესის დროს.

მეორე ტრუდოვიკი, გლეხი ბიჩკოვი, აცხადებს, რომ იძულებული იყო ხელი მოეწერა მოწოდებისათვის იმ ნაკაზის ძალით, რომელიც მისცეს მას გლეხებმა და ავალდებდნენ მას ღუმაში მოეთხოვა მიწა და თავისუფლება. მშვიერისა და ნახევრათ ჩაუცმელ გლეხების წარმომადგენელს არ შეეძლო სხვა ნაირათ მოქცეულიყო.

იურიდიულ დაცვაზე უარს აცხადებს ს.-დ. ფრაქციის ბრალდებულთა მხრივ ნაფ. ვექ. თანაშემ. ოესიანნიკოვი, პროკურორის ამხ. მხარს უჭერს ბრალდებას მთლათ.

ამის შემდეგ ნაფ. ვექ. გრუზენბერგმა მისცა კითხვა მოსამართლეებს:

— მართლა თქვენ, როგორც ამას პროკურორი ამბობს, დღეს არა გაქვთ გასარჩევი საქმე?

მართლა თქვენ იმისთვის ხომ არ შეიკრიბენით, რომ დაასოთ ბექედი წინააღმდეგ განმზადებულ განაჩენს, რომელიც წარმოადგენს მხოლოდ დეკემბრის პეტერბურგის სამოსამართლო პალატის განაჩენის პირს.

მე არ მინდა ეს დავიჯერო, რადგან ამის წინააღმდეგ პროტესტს აცხადებს ჩემი სამართლისადმი პატივისცემის გრძნობა.

მე მოვედი აქ იმისთვის კი არა, რომ გავეჯიბრობ-ბ პროკურორს ბრალდებულთა პოლიტიკურ მოქმედების დაფასებაში. დეპუტატების პოლიტიკ. მოქმედება სასამართლოს დაფასების გარეშე იმყოფება. ის მასზე მაღლა დგას.

იმ დღად ბრძოლაში, რომელსაც აწარმოებდნენ ხალხის წარმომადგენლები მთავრობასთან ხალხის თავისუფლებისათვის, უკანასკნელი სიტყვა არ ეკუთვნის არც პროკურორს, არც მოსამართლეებს, არამედ — მხოლოდ ხალხს — მართლ იმას. ამას დამნაშავეთ არ უცნია თავის არჩეულნი. ის არა სთვლის მათ დიდებული საქმის მოღალატეთ. ხალხმა იცის, რომ იდეების ფარგლებში, ახალი საუკუნის ფორმების დამყარებაში შეუძლებელია სამუდამო დამარცხება, — არის ხოლომე მართლ დროებით შეჩერება ხალხმა ეს იცის და ღრმათაღ დარწმუნებულია, რომ ის დიადი მიზნები, რომელიც დაისახა პირველმა ღუმამ, შეუძველათ და ძალიან ჩქარაც განხორციელდება.

*) ამ წერილის დაბეჭდა დაგვიანდა. რედ.

არა, მე, არც იდეებზე, არც იმ დიად მოვალეობაზე, რომელიც იწვევს ხალხს შეურიგებელ ბრძოლისაკენ, მანამდის საბოლოოთ არ გაიმარჯვებს ის, არ მინდა თქვენთან ლაპარაკი მსაჯულნო!

გრუზენბერგმა თავისი სიტყვა დაათავა შემდეგით: „მე თავს ვიხრი მათი ტანჯვის მშვენიერების წინაშე. მე ვაფასებ შესაფერისათ მათ აღფრთოვანებას, მარა მაინც მგონია, რომ მათი გამბედავი და ძლიერი ცხოვრებიდან სრულიად არა ღირს ამოგვლიჯოთ ტყუილ-უბრალოთ სამი თვე ციხეში სამყოფათ, როდესაც ეს დრო შეიძლება მოხმარდეს—შეუღარებლათ უკეთესს საქმეს“.

სალამოს 7 ს. გიმოაცხადს განაჩენი, რომელიც თითქმის განმეორებაა დეკემბრის საქმის განაჩენისა.

ყველა ბრალდებულნი იცნეს დამნაშავეთ და მიუსაჯეს სამ-სამი თვით. დაპატიმრება.

*
* *

ადამის ძეო, თავისუფლათ შექმნილ-აღზრდილო, შენთვის ხუნდები, ბორკილები რათ გამოსკედეს? რათ, რათ მოგისპეს შენს ნებაზე გარე ნაფარდი, და „ცხრა-კლიტულში“, გალიაში რისთვის ჩაგქედეს?! ეგებ, ჭაბუკო, ვერ შეეწყე ღუბჭირ ცხოვრებას: მდიდარს მოსტაცე, იყაჩაღე, კაცს არ ინდობდი? ან მყუდროება დაურღვიე ვინმე ბობოლას უბეში ქცევით, სითამამით არვის რილობდი?! ან იქნებ ძმა ძმას გადაჰკიდე, უღალატევი, რომ მხოლოდ შენთვის მოგესვენე ბედნიერება; სხვები ატირე, შენ კი შორით ილიმებოდი, — გულს გიხარებდა მათი ტანჯვა, მოძმეთა ვნება?! ან თუ სატრფოსგან დაჩაგრულმა შური იძიე: კაცი იმსხვერპლე, საზიზრობა რამ ჩაიდინე; მოჰკალ „მეტოქე“, დაარბიე შეყვარებულნი და იმათ კერას, თავ-შესაფარს ბღღვრი აღინე?! მაგრამ, რას ვამბობ! შენ ხომ შრომის მძიმე უღელი კისერზე გედო, ეწეოდი ჰაზან-წყვეტიტა? — ყველას მონურათ ქედს უხრიდი, ფხით ეგებოდი, უხმოთ იტანდი, თუნდ ეცემათ კიდევ კეთილთა!.. შენ ხომ ვერ გრძნობდი ცხოვრებისა უსამართლებას, როგორ გძარცვავდენ, ტყავს გაძრობდენ ემაგ ზურგზედა? არც ის იცოდი — შენის ოფლით ვინა ხარობდა, მხოლოდ შრომობდი... ჯანსა ცვეთილ ლუკმა-პურზედა... სატრფოს აღერსი? — ეგ ხომ შენთვის მოჩვენებაა! ვინ გიკადრებდა, ძმაო, მუშას მუდამ გამურულს?! ვინ იყო გიჟი, რომ შენთვისა ეთქვა: „მიყვარხარ“, განა ქალს შენებრ „უბედური“ აუტოკებს გულს?!. მაშ, რა მიზეზით დაგატყვევეს, დაგასაპყარეს, — ბნელ საკანშია რისთვის მოგცეს ჭაბუკსა ბინა? იმიტომ, რომა ვერ გაუძელ უღვთო შრომასა, ტანჯულმა გულმა ერთხელ მწარეთ ამოიგმინა?!.

ეხ, შრომის შეილო, მონავ ფულის, მონავ კაცისა, შენ არც კი უწყი, შენს ცხოვრებას თუ ვინა მართავს! დროა, დაფიქრდი, დაუკვირდი ვაგლახ ყოფასა: როდემდის გინდა მონათ იყვე? — ჰკითხე შენსა თავს...

ალ. გერასიმოვი.



დ ე ღ ე ბ ი

(მოთხრობა).

I.

გაცივებული დილა იყო. ღრუბლები მისცურავდა ცაზე, რომელიც აქა-იქ ლაქვარდ ზოლებად დასერილიყო. დრო და დრო მზე გამოიქიპტებდა, მაგრამ ისევ მალე იმალებოდა ღრუბლებში. ბუნებას უნდოდა ცრემლებათ დაღვრილიყო, მაგრამ თითქო რილასიც რცხვენია, ვერ ბედავდა.

ქალაქი ჩვეულებრივად ხმაურობდა, ლელავდა, ქუჩები ხალხით ავსილიყო. დესიკო მიდიოდა ქვაფენილზე წყნარათ. გახუნებულ მოსასხამის კალთებს მალმალ წინა სწევდა, თითქო ცდილობდა მთელი თავისი არსება მოსასხამში ჩაემაღა. დესიკოს მიმზიდველი, გამხდარი სახე მოქანცულიყო, რაღაც ნაღველს ხატავდა. ხშირათ შრიალით ჩამოუვლიდენ ახალგაზდა, უზრუნველი ქალები, კოხტათ გამოწყობილი ყმაწვილები, ამაყათ გამოძყურე მდიდრები, წელში მოხრილი დაავადებულნი სნეულნი. დესიკო არავის უყურებდა, იმას არავისთვის სცალოდა.

მაგრამ აგერა დესიკოს ყურში შეესმა აბრეშუმის კაბის შრიალი, თავი აიღო, რომ სული მოეთქვა და მოქანცულის თვალებით შეაჩერდა მშვენიერის ჟუჟუნა თვალებს. მშრენიერის ჟუჟუნა თვალებიც დაკვირვებით უყურებდენ დესიკოს, დასცქერავდენ იმის გახუნებულ მოსასხამზე. მშვენიერის წარბებ შუა გაუკეთდა ოდნავათ შესამჩნევი ნაკეცი, ლამაზმა ტურებმა გარშემო ჩრდილი შემოიყენეს, დესიკომ ცხადათ ამოიკითხა მის თვალებში: — „ვითომ შენც რამე ხარ ამ ქვეყანაზეო“?..

ამ დროს მშვენიერის წამოეწია კოხტა ყმაწვილი კაცი, ქალმა კეკლუცათ მიიღო მისი სალამი. დესიკომ კვალათ შეხედა მშვენიერს და ამისმა თვალებმაც უსიტყვოთ გადასცეს მაგიერი პასუხი:

— მებრალეები, საცოდვაო, რომ ცხოვრებას არ იცნობ!

კვალათ სურათი სურათმა შესცვალა, შთაბეჭდილებანი მოქუჩდენ და ერთმანეთში გაურკვეველად აირივნენ.

დესიკო უკვე მიახლოვებოდა ქალაქის ბაღს. შეუხვია ქვაფენილიდან.

დესიკომ იგრძნო, რომ თითქო ცოტათი შემსუბუქ-

და, ფეხ-ქვეშ ეგებოდა რბილი, ფხვიერი ღედა-მიწა, რომელიც ბილიკებათ მიდიოდა მწვანე ბუჩქებსა და მაღალ ხეებ შუა. ბუჩქებს გარს ევლებოდნენ წვრილი მავთულები, რომელნიც იფარავდნენ ათასფერათ გამოწყურე ყვავილებს შეხებისაგან. ხეებ ქვეშ სკამებზე მოსჩანდნენ ახალგაზდანი, ზოგან დარბაისელნიც, დესიკო აქეთ-იქით იუზრებოდა, ეძებდა ცარიელ სკამს, მაგრამ ყველგან ადგილი დაქვრილი იყო.

—რა დროს დასვენებაა! ისინი ყოველთვის ქვევით ბაღში არიას ხოლმე, გაიფიქრა დესიკომ და გადიარა ქუჩა, რომელიც შუაზე ჰყოფდა ბაღს. მართლაც აქ სკამებზე ჩამწკრივებული იყვნენ ქალები, გამვლელ-გამომვლელს შესჩერებოდნენ.

დესიკომ ფეხს აუჩქარა. მივიდა ერთ სკამთან, რომელზედაც ცარიელი ადგილი დარჩენილიყო და დაჯდა. დაღალვისგან გული ასდი-დასდიოდა, ხელსახოცით ოფლს იწმენდავდა, კარგა ხანს ხმას ვერ იღებდა. აგერა დესიკომ მოხედა ქალებს და ღიმილით ჰკითხა:

—თქვენში მოსამსახურეთ ხომ არავინ ღებდა?

—ყველანიც ვეძებთ ადგილს, მოისმა პასუხი.

დესიკომ ჩამოათვალიერა ქალები.

—თქვენ როგორი მოსამსახურე გნებავთ: მზარეული, მოახლე, მოსარეცხე, თუ ყმაწვილების მომვლელი? ჰკითხა ბოხი ხმით ერთმა შავ-კაბა შუახნის ქალმა, რომელსაც სახე ქარხალსავით გასწითლებოდა, ცხვირის წეს-ტოები ბურნუთით გამუროდა.

—მე მინდა იმისთანა, რომ რაც საჭირო იქნება ყველაფერი გამიკეთოს, სადილი მოამზადოს, სარეცხი დარეცხოს, ოთახები დააღაგოს, უპასუხა დესიკომ.

—ყმაწვილებიცა გყავთ?

—მყავს.

—რავდენი?

—ორი.

—დღი თუ პატარები?

—უფროსი ხუთი წლისაა, უნცროსი სამისა. ბავშვებს მე თვითონ ვუვლი. მარტო მაშინ თუ დაიჭერს მათზე თვალს, როდესაც რამე საქმისთვის მომიხდება სადმე წასვლა.

—ჯამაგირს რას იძლევი? ჰკითხა კვალათ შავ-კაბა ქალმა და სახეზე დამცინავე ღიმილმა გადაურბინა.

—თუმანს.

—მაგდენი საქმე და თუმანი?... თავი მოსაკლავი ვისა აქვს!.. ოხერი თუ იქნება ვინმე, თორემ მაგ ფასში ვინ დაგიდგებათ?..

ამის გაგონებაზე სხვა ქალებმა სახე არიდეს დესიკოს და იქით მიბრუნდნენ.

—მაგას რათ ამბობ, ჩემო დედა, ყველას თავისი ანგარიში აქვს. ვისთვისაც სასარგებლო არ არის ამ ფასში წამოსვლა, რასაკვირელია, არ წამოვა, მაგრამ ყველა ხომ შენებურათ არა სჯის? თვეში თუმანი არც ისე ცოტაა, რო აგრე სუბუქათ დაიჭირე, ვისაც როგორც უჭირს, ისე უღირს! დაუმატა დესიკომ და გადახედა ქალებს.

დესიკოს არ მოსწონდა შავკაბა ქალი და გადასწყვეტა კიდევაც რომ წამოჰყოლოდა, არ აეყვანა და ახლოს სხვებს მიმართა.

არც ერთის აქ მოყოფის შეხედულობა დესიკოს გულს არ იკარებდა, რომელნიც უფრო ყმაწვილები იყვნენ. ფერ-უმარილისაგან სახე ულაპლაპებდათ, ტუჩები შეღებოდათ, თავიდან მოსახვევი გადასცუროდათ და შუბლზე გამოჩენილი ხუჭუქები გადმოწეწოდათ. მათი თვალები ხშირათ იხედებოდნენ იმ მხრისკენ, საითაც ახალგაზდა ბიჭები შეგროვლიყვნენ და ერთმანეთში ლაზნანდარობდნენ. ეტყობოდათ ისინიც ადგილების მიძებნელნი იყვნენ და ცუდების გამო ლაპარაკით თავს იქცევდნენ.

—შენ რაღას აკეთებ აქ?... მიუბრუნდა დესიკო ახალგაზდა ქალს, რომელიც საშინლად გამხდარიყო, სახეზე სიკვდილის ფერი დასდებოდა.

—ესეც ადგილს ეძებს... მიატანეს აქეთ-იქით ქალებმა.

—ადგილსო? მერე სად შეუძლიან ადგილზე დადგომა, როდესაც ავადმყოფია?

—მე ავთ აღარა ვარ, ქალბატონო, მოვრჩი. ორი დღეც იქნება, რაც საავადმყოფოდგან გამოვეწერე! დილაპარაკა სუსტის ხმით ქალმა და ვედრებით შეხედა დესიკოს, თითქო სთხოვდა აეყვანა. დესიკოს შეეცოდა და თანაგრძნობით ჰკითხა:

—რითი იყავი ავთ?

—ალბათ გავცივდი. უპასუხა ქალმა.

სხვა ქალებმა კი პირზე ხელი მიიფარეს, თითქო სიცილს იკავებდნენ. დესიკო მიხვდა, რომ სწეული ქალი სტყუოდა, იმის თავს სხვა უფრო სახიფათო იყო და თვალი მოაშორა. ეს დარწმუნდა, რომ ამ სკამზე ამისთვის არც ერთი გამოსადეგარი არ იყო და ადგა ზეზე.

—თხუთმეტი მანეთი მიბოძეთ და მე წამოგყვებით, შეევაქრა ისევ შავკაბა ქალი.

—არა, არა! საჩქაროთ მიატანა დესიკომ და მოშორდა სკამს.

—შენისთანა გახუცებულ ქალბატონისგან მეტსაც არ უნდა მოელოდეს აღმამანი. მოესმა უკანდან, მაგრამ დესიკომ ყური არ ათხოვა ამ სიტყვას და სხვა სკამთან მივიდა, მაგრამ სხვა ქალებმაც იცოტავეს დესიკოს ჯამაგირი.

—თუ გნებავთ, მოახლედ წამოვალ, უთხრა ტუჩების კვნეხით ახალგაზდა ქალმა;

—ჯერჯერობით ერთი დედაკაცი მეყოლება და მერე ამ ცოტა ხანში ძიძის შოვნაც დამპირდება, განაგრძო დესიკომ.

—ძიძაც დაჭირდებათ? იკითხა მეორე ქალმა, რომელიც აქამდის ხმას არ იღებდა.

—ჰო, დამპირდება, მიუგო დესიკომ.

—მაშ მე წამოგყვებით, ქალბატონო, სთქვა ისევ იმ ქალმა და წელში გაიშარათა.

—მე ეხლა ძიძას არ ვეძებ...

—არა, ქალბატონო, წინანდელ პირობაზე გიახლუბით.

—შენ მისდევ, ნატო? გაცეცებით შეეკითხნენ ქალები და უკმაყოფილოთ შებღვირეს.

—მარტო წასვლა კი არ არის. საქმე პირობის შესრულებაა.

—თუ ვიცისრებ, კიდევაც შევასრულებ, უპასუხა მკვებელ ქალმა და ისევ მიუბრუნდა დესიკოს, რომელსაც გული მოსდიოდა ქალების მეტიჩრობაზე.

—ბავშვი ხომ არ არის, თავისი საქმე თვითონ უფრო არ იცის... რაკი თქვენ არ გინდით წამოსვლა, სხვას რაღათ უშლით? მოუთმენლათ ჰკითხა დესიკომ.

—ჩვენ რა... ჩვენ რა გვენადვლება! წაიბურტყუნეს დედაკაცებმა.

—მაშ ყველაფერი შეგიძლიან ღამიკეთო თვეში თუშნათ? ჰკითხა ნატოს დესიკომ.

—ყველაფერი.

—ბილტით ხო გაქვს?

—მაქვს.

—მაშ წავიდეთ.

—აი გიანლებით, უპასუხა მორჩილათ ნატომ, წამოდგა, შალი გაისწორა და გამოჰყვა.

(შემდეგ იქნება).

ანანტასია ერისთავ-ხოშტარია.



ავსტრიის მომხმარებელ

საზოგადოებათა კონგრესზე.

წერილი ვენიდან.

ამ დღეებში ქ. ვენაში მთელი ავსტრიის მომხმარებელ საზოგადოებათა კავშირმა მოახდინა მეექვსე სიუზი. 134 საზოგადოებისაგან იყვნენ გამოგზავნილი დელეგატები. სხდომას დაესწრნენ აგრეთვე სტუმართა საგრძნობელი რიცხვი; იყვნენ გერმანიის და ინგლისის მომხმარებელ საზოგადოებათა წარმომადგენლები, მხურვალე მონაწილეობას იღებდნენ თვით ავსტრიის ს.-დემოკრატიულ პარტიის და პროფესიონალურ კავშირთა წარმომადგენლებიც. კრება გახსნილ იქნა ადგილობრივ ს.-დ. ცენტრალურ კომიტეტის წევრთა, ამხ. ემპერლინგის და ნეეოლის თავმჯდომარეობით.

უმთავრესი გადასაწყვეტი საკითხი იყო ის, თუ როგორ საშუალებებით უნდა ებრძოლოს კონსუმ-ფერაინებმა*) წვილლ მრეწველ-ვაჭართა შეუწყნარებელ თავხედობას და თავგასულობას. როგორც დელეგატები კრებას აუწყებენ, ამ ბოლო ხანში წვილლ-ვაჭართა გაშმაგებული გამოლაშქრება კონსუმ-ფერაინების წინააღმდეგ სახუმარო საქმედ ვერ ჩაითვლება და ჩვენგან ითხოვს შესაფერზომების მიღებას. მართლაც, თუ წინათ კანონი შესახებ კავშირის დაარსების და მოქმედების ასე თუ ისე დაუბრ-

კოლექტივ ცხოვრებაში ტარდებოდა,—ეს კანონი ავსტრიაში 1878 წლიდან არსებობს,—დღეს ის შეზღუდულია, დღეს მისი განხორციელება საშინლათ ფერხდება და ძველდება. აშკარა და უმთავრესი დევნა ამ კანონისა სასამართლოების მხრიდან სწარმოებს, თუმცა, როგორც ქვემოთ გავიგებთ, სახელმწიფოს სათავეში მდგომი მთავრობაც მის შელახვას ხელს არ აკლებს. ახლათ დაარსებული ფერაინის დამტკიცების დროს სასამართლოები ყოველგვარ ხრიკებით და ძალ-მომრეობით სარგებლობენ, რომ მით, ვითომდა არსებულ კანონის ძალით, შეუძლებელით ჰყონ ფერაინის ცხოვრებაში გატარება და მოქმედება. ამ აზრის დასამტკიცებლათ ერთი რეფერენტი კრებას ამცნობს მთელი რიგ ფაქტებს, სადაც ნათლათ გამოკრთის სასამართლოების უსამართლობა. მაგ. ერთ ალაგას ერთმა ფერაინმა სახელათ დაირქვა „არა დახურულ (nicht geschlossstene) წვერთა რიცხვის ფერაინი“. როდესაც ამ ფერაინის კანონიერათ აღიარებაზე მიდგა საქმე, სავაქრო სასამართლომ ის არ დაამტკიცა იმ მოსაზრებით, რომ დასახელებული ფერაინი მუშების ფერაინია, და არა „რალაც“—„არა დახურულ წვერთა რიცხვის ფერაინი“. მეორე შემთხვევა ეხება ფერაინის სტატუტის ერთ მუხლს. ამ მუხლის ძალით წვერი ირიცხება ფერაინიდან, თუ კი მას სამი თვის განმავლობაში ფერაინის საქონელთა საწყობისაგან არაფერი გაუტანია, ესეც სასამართლოსაგან უკანონოთ იქნა აღიარებული იმ ხრიკით, რომ თუ ერთი არ იყიდის, სხვა წვერები ხომ მაინც ხარჯდებიან და რათ დაგვირდათ ამ გვარი უკანონობის გაბატონებაო. კიდევ შეიძლება აუარებელი მაგალითების მოყვანა, მაგრამ ვშიშობ ეს ძლიერ შორს წაგვიყვანს და საქმის გასაცნობათ წარმოდგენილი მასალაც საკმარისია. რაც შეეხება თვით მაღალ მთავრობის მოქმედებას, არც ის იხვეს უკან და ყოველ ღონეს ხმარობს არსებულ კავშირთა შედგენის შესახებ კანონს როგორმე ფრთა შეაკვეცოს და შეზღუდოს. მთავრობა კიდევ ალაპარაკდა კავშირის კანონის შეცვლის საჭიროებაზე, მან უკვე დანიშნა განსაკუთრებული წინასწარი კომისია, რომელსაც დაავალა რაიმე პროექტის შემუშავება შესახებ კავშირის კანონის შეცვლისა ანუ შესწორებისა. თუ მხედველობაში მივიღებთ იმას, რაც ამ კომისიის მუშაობაზე ისმის, მაშინ დაბეჯითებით შეგვიძლია ვიფიქროთ, რომ კანონის შეცვლა-შესწორება წვილლ-ვაჭართა სასარგებლოთ იქნება მოხდენილი. ძნელი გასაგები არ არის თუ რით აიხსნება ამ გვარი განზრახვა მთავრობისა და სასამართლოებისა.

დღეს ავსტრიაში სახელმწიფოს მართვა-გამგეობის საქმე სავესებით კლერიკალურ პარტიის ხელშია; მისი ბატონობა აქ დღეს განუსაზღვრელია; მთავრობაც იძულებულია მის მოთხოვნას ყური ათხოვოს და წარბ-შეუხრელათ ყოველ მის გულის წადილს, მის სურვილს ანგარიში გაუწიოს. თავის მხრივ კლერიკალური პარტია განსაკუთრებულ საჭიროებას ხედავს თავის ბატონობის შესანარჩუნებლათ და უფრო გასაძლიერებლათ წვილლ-

*) ალაზ-ალაგ ვხმარობ სიტყვას „კონსუმ-ფერაინებს“—მომხმარებელ საზოგადოებათა მაგივრათ.

მრწველ-ვაჟარ მასასთან მტკიცე კავშირი შეჰქარას და ნიშნათ მის კეთილ-მსურველობისა კონსუმ-ფერაინების წინააღმდეგ ბრძოლა გააჩაღოს. ექვს გარეშეა, დღეს წვრილ-ვაჟართათვის თვალსაჩინო და აშკარათ ხდება ის გარემოება, რომ რაც უფრო იზრდებიან და ვითარდებიან კონსუმ-ფერაინები, მით უფრო ეცლებათ მათ ფეხ-ქვეშ ნიადაგი, მით უფრო საექვეთ ხდება მათთვის წვრილ-წარმოების შემწვობით სასურველ მომავლის განხორციელება, ისინი, როგორც წვრილი მესაკუთრენი ბუნებრივად იძულებულნი ხდებიან, ან თავი გაანებოს თავის საქმეს და ან კიდევ შეეცადოს ბრძოლით ძველი ღრრის დაბრუნება, როდესაც კონსუმ-ფერაინების ქიშპობა არ არსებობდა. ისინი თავის ვაჟრულ პსიხოლოგიას ვერ ღალატობენ და არჩევენ მეორე გზას, — ბრძოლას ახლათ მოვლენილ მტერთა წინააღმდეგ.

კონსუმ-ფერაინების წარმოშობა-განვითარება, როგორც განმანადგურებელი მომენტი წვრილ-ვაჟრების ცხოვრებაში, ბუნებრივი და სულ ადვილათ გასაგებია. მეტსაც ვიტყვით — ის აუცილებელია, რადგან ერთი მეორის უარ-მყოფ ძალებს წარმოადგენენ. კონსუმ-ფერაინის მიზანია, რაც შეიძლება კარგი და ღირსებიანი საქონელი შეიძინოს და რაც შეიძლება ნაკლებ, ხელსაყრელ ფასებში დაუთმოს მყიდველს; მიზანი წვრილ ვაჟრისა კი ამ გვარი ვერ იქნება, რადგან ის თავის ინტერესთა წინააღმდეგ ვერ წავა. ცუდი, ნაკლები ღირსების საქონლის შეძენა მწარმოებლისაგან, და მეტი მოგება, მეტ ფასებში გაყიდვა, — აი წვრილ-ვაჟრის გულის თქმა, აი მისი სათაყვანებელი პრინციპი. აქედან აუცილებელი შედეგია, რომ მყიდველი წვრილ-ვაჟართა საქონლით არ სარგებლობს და ფერაინების საქონელთა საწყობში მიეშურება. მყიდველთა რიცხვის შემოკლება საფასვრით გვიხსნის წვრილ-ვაჟრის სასოწარკვეთილებას, მის ტირილს და ღრიალს, მის გაშმაგებას: „არიქა! გვიშველეთ, ვილუბებით, მტერი თავიდან მოგვაშორეთ“.

მუშათა კლასისათვის მომხმარებელ საზოგადოებათა მნიშვნელობას — რაც ევროპაში წინათ აბსურდად იყო მიღებული — დღეს ვერავინ ყოფს უარს. კარლ კაუცკი ერთ ალაგას შემდეგ აზრს იცავს: „მომხმარებელ საზოგადოებათა დაარსება საფასვრით ეთანხმება ჩვენი პროგრამის პრინციპებს, ის კი არაა, ხანდისხან ჩვენი პროგრამა პირდაპირ გვიკარნახებს მის დაარსებას“.

მეორე ალაგას ის სწერს: „თუ სხვები პირდაპირ სასაცილო ილიუზიებით და იმედებით იმსკვლეებიან მომხმარებელ საზოგადოებათა მნიშვნელობის შესახებ, ეს ჩვენ მაინც არ გვიშლის ვალიაროთ, რომ მომხმარებელ საზოგადოებებს შეუძლიათ დიდი როლი ითამაშონ მუშათა განმათავისუფლებელ ბრძოლაში, მაგრამ, დასძენს კაუცკი, არა იმგვარი, როგორც პოლიტიკურ და პროფესიონალურ ორგანიზაციებსა“. (იხ. „მომხმარებელი ამხანაგობები“ კ. კაუცკისა). ექვს გარეშეა, გადაქარბებულიც არ უნდა იქნას მომხმარებელ საზოგადოებათა მნიშვნელობა მუშათა კლასის საქმისათვის, როგორც

ეს ბევრ ჩვენ მოწინააღმდეგეებს წარმოუდგენიათ. ყალბია მათი შეხედულება, ვითომ მომხმარებელ საზოგადოებებს და საერთოდ კოოპერატიულ — მოძრაობას საზოგადოთ სოციალურ კითხვას გადაჭრა შეეძლოს, ვითომ კოოპერატივების საშუალებით შესაძლებელი იყოს მუშათა კლასის მიერ სოციალიზმის განხორციელება. ეს შეპყდარი აზრია შექველათ, მაგრამ არც ის უნდა დაივიწყოთ, რომ თვით განსაზღვრული მნიშვნელობა მომხმარებელ საზოგადოებების მუშათა კლასისთვის, როგორც ერთ-ერთ საშუალებათაგანის მის ეკონომიურ და კულტურულ მდგომარეობის ასამაღლებლათ, თვით ამ გვარი მნიშვნელობა ყოველგან და ყოველთვის გადაჭრილით მისაღები ვერ იქნება.

(შემდეგი იქნება).

მ. მაგალობლიშვილი.

მუშნალ-გაზეთებიდან.

ნაციონალური პატივი. ამ ქამათ ბელგიის პოლიტიკურ ცხოვრებაში დიდ საკითხათ გადაქცეულა კონგოს (აფრიკაშია) შემოკრთების საქმე. ამის შესახებ იქაურ გაზ. „Petit Bleu“-ში ცნობილმა იურისტმა და სენატორმა ედმონდ პიკარმა — მიმართულებით სოციალისტია — ამას წინათ მოათავსა ერთი წერილი, სადაც იგი იმ აზრს გამოსთქვამს, რომ ბელგია, თუ არ მისაკუთრებდა აფრიკის ხსენებულ კუთხეს, იგი არა მარტო ნივთიერათ ჩამოკვეთილბოდა, არამედ აგრეთვე ზნეობრივათაც დამცირდებოდა. ბ-ნი პიკარი, სხვათაშორის, სწერს:

„ხალხები, რომორც ინდივიდები, უმეტესათ სულდგმულობენ თავიანთ ღირსება — პატივით. ამ ზნეობრივ მარბალიტს (განძეულობას) მათზე და სხვებზედაც საუცხოვო და ჯადოსნური ზეგავლენა აქვს. არ შეიძლება შენ თავსა გრძნობდე შელახულათ ან სხვას ეჩვენებოდე დამცირებულათ. ყოველივე ზნეობრივ დამცირებას კერძო თუ საზოგადოებრივ ცხოვრებაში შედეგათ მოსდევს პირადი ენერგიის დაქვეითება და სოციალურ და ინტერნაციონალურ ურთიერთობათა დასუსტება... „გარდაუვალი ძალა, რომლის სათავე კარბათ არ არის გამოკვეთილი, ევროპა — ამერიკულ რასის ხალხებს ეწევა კოლონიზაციისაკენ. ამ ხალხთა ბედ-იღბალი თითქმის ბანგებისაგან აღბეჭდილია საიდუმლო მიზნით, რომელსაც ვერავინ დამალბება ისე, რომ არ ჩავარდეს დიდ განსაცდელში. ყველაზე უფრო საუკეთესო ქცევა ის არის, რომ აღამიანი და ნაციები საფასვრით მიენდონ ამ დიდ ისტორიულ მიმდინარეობათ, რომლის ბედნიერი შედეგი — ზომჯერ უზილავათ დაფარული თანამედროვეთათვის — გამობრწყინდება მხოლოდ მომავალში...“

ასეთ მოსაზრებებით პატივცემული ავტორი ბელგიის ხალხს ურჩევს კონგოს დაპატრონებას, იგი ერთობ მოქარგული ენითა სწერს, მაგრამ ამაოთ. ჩვენც დიდათ ვაფასებთ ნაციონალურ ღირსება — პატივის შეგნებას, ვაფასებთ ნაციონალურ თავმოყვარეობას, მარა მაინც უნდა შევნიშნოთ, რომ მხოლოდ ნაციონალურ

გრძნობებზე მინაბრებულ ადამიანმა—თუნდაც იგი სუბიექტიურათ სოციალისტიკ იყოს—ძალიან ადვილათ შეიძლება შეტოვოს, და უნუგუშოთ შეტოვოს, ნაციონალიზმის მოარევში. ამას მკერ-მეტყველურათ მოწმობს ზემოთ მოყვანილი სტრიქონები.

* *

რუსეთის ეკლესია-მონასტრებში. კიევში გამართულ მისიონერთა სიგზლის გამო, სადაც თათბირია „ქრისტიანულ სათნოების მქადაგებელთა“ დიად ზნეობრივ დანიშნულებაზე, სხვათა შორის, გაზ. „Спб. Вѣд.“ სწერს:

„ჩვენ გვეუბრება, რომ მისიონერობაზე ლაპარაკი ჩვენი მონასტრებისათვის ჯერ კიდევ ადრეა: უწინარეს ყოვლისა ჩვენი მონასტრები წმ. ეკლესიიდან არავის არ უნდა აფრთხილებდნენ და არ უნდა აცდუნებდნენ თავიანთ საზიზღარ შინაური წყობილებით და არა ნაკლებ საზიზღარ გარეგნობით.

სათქმელათაც სამარცხვინოა: ლოთობა ბერებისათვის აღარ ითვლება მხატვრობათ. ზომიერი გარყვნილება, — „მხოლოდ უსკანდალოთ“, — ითვლება აგრეთვე ბერების უბიწო გართობათ... სიმართლითა და სიმტკუნით კაპიტალების შეგროვებაც სრულიად არ ითვლება თვით მონაზვნობის აზრის უარყოფათ. ერთის სიტყვით თანამედროვე ბერი, — ეს მხოლოდ უცხოლო კაცია, რომელიც არაფერს არ იკლებს, ქვეით-დროს-ტარება და თვით ვენერიულ ავთიმყოფობათა რჩენა მისთვის ჩვეულებრივი რამეა.

იგივე გაზეთი და თვით ისეთი ორგანოც, როგორცაა „Моск. Вѣд.“, იმავე ბნელი ფერადებით აღწერენ აგრეთვე რუსეთის სამღვდელთა ზნეობრივ გათხსირებას, და ბოლოს დაასკენიან, რომ ბოროტების ძირი არქიეპისკოპოსებში უნდა ვეძიოთო. ნამდვილათ კი, საქმეში ჩახედულმა იცის, რომ ასეთი ძირი დაფარულია თვით საზოგადოებრივ და პოლიტიკურ ვითარებაში.

* *

რა არის თანამედროვე რუსეთი? გაზ. „Руск. Вѣд.“-ში ბ-ნი ა. კიზევეტერის სწერს:

„თუ შეგეკითხონ: რა არის თანამედროვე რუსეთი? — უბასუხეთ: ეს არის ქვეყანა, სადაც მინისტრი ღმერთს მადლობას სწირავს და იმედი აქვს ახალი სესხის აღებისა; გუბერნატორი თავს უხერხულათ გრძნობს იმ დამღუპველ „საგმირო“ საქმეებით, რასაც ახდენენ მის მიერვე ნაქმბ-ნადიდები დამცველები, ხოლო კაცთ-მოყვარე ფილოსოფოსი კი *), განსკვრეტს რა გარშემორტყმულ ვითარებას, მტანჯველ მწუხარებით ნატრობს თავის თავისთვის საღრრობელს“. მახლას!

სასლგარ-გარეთ.

მოხუცებულ მუშათა პენსია ინგლისში. ბილი (კანონ-პროექტი) მოხუც მუშათათვის სახელმწიფოს მიერ პენსიის დანიშვნის შესახებ შესამთ წაკითხვის შემდეგ ბავილა ქვედა პალატაში. ჩვენი დროის ერთი უმთავრესი რე-

ფორმატაგანი, რომელიც გვამცნობს საზოგადოების ახალ დამოკიდებულებას თითოეულ მოქალაქის ზიარებასთან უნდა განხორციელდეს ამ ახლო მომავალში. კანონ-პროექტის გარჩევის დროს ფინანსთა მინისტრმა წამოაყენა ასეთი თეზისი: „თითოეულს, ვინც თავის შრომით დახმარების ღირებულების შექმნას, უკვე აქვს უფლება მიიღოს ჯილდო სახელმწიფოსაგან, როდესაც მას მოხუცებულობა წაართმევს ღონეს“. კანონ-პროექტის გარჩევის დროს ოპოზიციის ჭქმნა ნამდვილი ზარტყანული ხასიათი. კონსერვატორებმა ვერ მიახერხეს პრინციპიალურათ ბილის წინააღმდეგ წასვლა, ამისთვის იმათ გადასწვდით, რომ კერძო კომპანიებს (დებუტატებს) მიეტანათ იერიში. კომპანეთა ერთი მუჭა ჯგუფიდან გამოვიდა კენრი-კრეკი, რომელიც თხოულობდა კანონ-პროექტის რევიდან მოხსნას. ის სსახუტებდა თავის მოთხოვნას იმით, რომ ეს ბილი ეწინააღმდეგებოდა ზარტყანულის მთელ წასრულ მოდგაწეობას დატაკათ მდგომარეობის გაუმჯობესების საქმეში. აქამდის ამგვარი მოქმედება ეთანხმებოდა ზრანტებებს, რომელზედაც აშენებულია 1834 წ. კანონი დაზრბების შესახებ. მართლაც, ამის შემდეგ ზარბები შეიტვალა, მაგრამ მთავრობამ ამისთვის დანიშნა კომისია, რომელიც უნდა გამოავლიოს, თუ როგორ სწამოებს კანონი დატაკათ შესახებ. „ეხლა კი — გულის წეროთ ამბობს სერ კენრი კრეკი — მთავრობამ არ დაუტადა ამ კომისიას და შემოაქვს სრულიათ ახალი კანონ-პროექტი დატაკ მოხუცების შესახებ. მთავრობა ბაძამს ახალ ზეჯანდას, რომელიც დიდი ბრატნიის ოდენა სივრცით, მაგრამ მისი მცხოვრებთა რიცხვი არ აღემატება ინგლისის ზრანტიალურთ ქალაქის მცხოვრებლებისას. მისთვის ძველმა ინგლისმა თავის მრავალსაუკუნეობიან კულტურით უნდა მიბაძოს ახალ ქვეყანას, რომელიც აღორძინდა ჩვენი თვალის წინ“ რისთვისაა მეტრეპოლი ვაღდებუდი, რომ მიბაძოს კოლონიას, რომელიც არ იცის რთული სოციალური კითხვები?“ სერ ჭენრი-კრეკის აზრით რეფორმას მოჭევება დამღუპველი შედეგები. ჯილდო შეამცირებს გასასუიდელ ძადას იმ მოხუცებულთა, რომელთაც შეაგროვეს თავის მცირე-რამ რენტა. ჯილდოს მიღების დროს მოხუცებულები იძულებული იქმნებიან მოისმინონ დამამცირებელი კითხვები. სერ ჭენრი პრატესტს ატადებდა ბილის შესამთ წაკითხვის წინააღმდეგ, რადგან ის არის წინამორბედი აუარებელ სოციალისტურ ზომებისა. თუ ეს ბილი გავა, ზარტყები დაუწევებ ერთი-მეორეს მეტოქეობას სხვადასხვა სრიაებში ამჩვენების მისამხრობათ. სერ ჭრეის რეზოლიუციას ბილის რევიდან მოხსნის შესახებ მარტო ათმა კაცმა მისცა ხმა. ოპოზიციის ბეჯადები ან გავიდენ ზაჯატადან ან სამინისტროს ბილს მისცეს ხმა. მეორე რევი წინააღმდეგობა იყო ასეთი. კრიტიკოსები არაფერს არ ამბობდნენ პრინციპიალურათ ბილის წინააღმდეგ. მაგრამ როგორც „მეგობრები ხალხისა“, კონსერვატორები ბერს დაზარაობდნენ საჯნის ტანჯვის შესახებ. კრიტიკოსები აღნიშნავდნენ იმას, რომ თუ მომავალში დაჩქობოდა ისეთი წესი ხარჯ-გაწერისა, რომელიც ეხლა არსებობს, არ იკმარებს ფული მოხუცთა ჯილდოსათვის. ეს რეფორმა აძულებს ქვეყანას, რომ შეამციროს ხარჯი ფლოტზე. უფრო გა-

*) იგულისხმებ ლევ ტოლსტოის უკანასკნელი წერილი — სიკვდილით დასჯის წინააღმდეგ — „არ შემოძლიან გაეზუმდე“.

ბედულები ამტკიცებდნენ, რომ საჭიროა გაიძულოთ „უცხო-
ლი გადაიხადოს“. შემდეგ აღნიშნულენ ისეთ არგუმენტებს,
რომელიც კონტინენტის (ხმელეთის) მცხოვრებთათვის სრუ-
ლიად გაუგებარია. ინგლისში არაა საჭირო არავითარი დო-
კუმენტი. მილიონობით იბადება ხალხი, სწავლობს, ქორწი-
ნდება, ვაჭრობს, მოგზაურობს, მაგრამ არაფერს არ გრძნობს
დოკუმენტების საჭიროებას. ინგლისელები ძვირათ აფასებენ
ამ ზიარდ თავისუფლებას და მადლიან დაჰყურებენ არა თუ
რუსებს, რომელთაც უზარმაზრობით არ შეუძლიათ ბინის გა-
მოცლა, არამედ ნემცებსა და ფრანგებსაც. კონსერვატორე-
ბის ბუჯადი არწმუნებს კომუნერებს, რომ ამ ბილის გასვლით
შეეგუებება ბრიტანიის თავისუფლებას ფრთებიო. მართლა—
ამბობს ბაღფური—ბუბერი, რომელიც მიმართავს სახენსიო კა-
სას, იძულებულია დაამტკიცოს, რომ ის სიმოც და ათი წლისაა.
როგორ უნდა დაამტკიცოს? საჭიროა მეტრიკული მოწმობა,
ვისა აქვს ეს? თქმა არ უნდა, რომ ეს არგუმენტი არა ერთ-
ხელ ორხელ განმეორდება კონსერვატორების მიტინგებზე.
ლიბერალურ სამინისტროს დასდებენ ბრალს იმაში, რომ მან
მცხოვრებთა ერთი ნაწილი ჩააყენა ისეთ გარემოებაში, რომ
ის იძულებულია დოკუმენტებით დაამტკიცოს თავის ხნოვანე-
ბა. მუშათა დემუტატებიც აკრიტიკებდნენ ბილს და თხოულ-
ბდნენ 65 წ. 70 წლის მაგიერათ. მიუხედავად ამისა ბილი
ერთხმით იქნა მიღებული. მთავრობამ მიიღო რამდენიმე არ-
სებითი შესწორება ბილისა, რომელიც უზგენეს მუშათა დე-
მუტატებმა. აგრე, ესლა ჯილდოს სიდიდე დამოკიდებულია
მოხუტთა შემოსავალზე (slieling scale). ბევრი მოხუცი უკვე
იღებს ზომებს, რომ ისარგებლოს ახალი კანონით. (თუ
ღორდთა მაღალტამ არ უარყვო 1 იანვრიდან 1909 წ. შევა
ძალაში). როგორც ვიცით, ჯილდოს სახელმწიფოსაგან მიი-
ღებს ის მოხუცი, რომელიც არ ღებულობს თოთხმეტს შიღინგზე
მეტს კვირაში. ის მოხუცი, რომელიც მიმართავდა ჯილდოს
გაღებულ იყო დემუტაციებია თავის შრომის მოყვარობა,
რაც იწვევდა ბიუროკრატის ჩარევას კერძო ცხოვრებაში და
რაც ინგლისელს ძალზე სამარცხეინოთ მიაჩნია, ესლა მუშა-
თა დემუტატების შესწორების შემდეგ ეს ნაკლიც ამოიღებულ
იქნა. იმ მოხუცს, რომელიც მიმართავს სახელმწიფო ჯილ-
დოს, საკმარისია იმის საბუთი, რომ ის 10 წელიწადია წევ-
რია ტრედიუნიონის ან მეგობართა საზოგადოების—ეს კი
საკმარისი საბუთია შრომის შესყვარების დასამტკიცებლათ.
უწინარეს უფლისა კანონ-პროექტის ნაკლათ უნდა ჩათვა-
ლოს ის, რომ ბენსიის მიღების უფლება ეძლევა მხოლოდ
სამოცდათი წლის მოხუცებს. დღევანდელ ფაბრიკის ზი-
რობებში სამოცდა წლის მოხუცებს აღარ შეუძლიათ იზოგონ
სამუშაო. მაგრამ ფაბრიკის მუშები ჩვეულებრივად ეკუთვნიან
რომელიმე ტრედიუნიონს, საიდანაც ღებულობს მცირე რა-
დახმარებას. მაგრამ შავ მუშებს არ შეუძლიათ გადაიხადონ
საწევრო ფული და ამისთვის რხებიან გარეთ. სამოცდახუთი
წლის შავი მუშა უკვე დაუძლურებულია. პრემიერმა და
ფინანსთა, მინისტრმა მიიღეს, რომ საჭი-
რო იყო ბენსიის შემოღება 65 წლიდან, მაგრამ ამისთვის

საჭირო იქნებოდა 130,000,000 მან. წელიწადში და 70
წლიდან კი საჭიროა 70,000,000 მ.; აი ამისთვის სახენსიო
წლოვანობის ვადის შემცირება უნდა გადაიდოს. მეორე ნა-
ლი ბილისა ისაა, რომ ის დატაკები, რომელნიც ღებულო-
ბენ საზოგადო დახმარებას, არ შედიან შიგ. ფინანსთა მინი-
სტრმა სთქვა, რომ მომავალ 1909 წელს შემოიტანს კანონ-
პროექტს დატაკთა შესახებ არსებულ კანონთა შესაცვლელათ.
თქმა არ უნდა, ეს კანონ-პროექტი ანიჭებს მოქალაქეს
ახალ უფლებას. აი სწორეთ ამაში მდგომარეობს უწინარეს
უფლისა მისი სიდიადე.

ლიონეო.



ყოველკვირეული საპოლიტიკო, სამეცნიერო და
სალიტერატურო გაზეთი

ჩვენნი კვალნი

გაზეთის ფასი:

თბილისსა და თბილის გარეთ	7 მ. — კ.
ნახევარ წლით —	3 მ. — კ.
სამი თვით —	1 მ. 60 კ.
საზღვარ გარეთ ერთი წლით	7 მ. — კ.
ნახევარ წლით —	4 მ. — კ.
სამი თვით —	2 მ. — კ.

ცალკე ნომერი ყოველგან ორი შაური.

ხელის მოწერა შეიძლება: თბილისში, წიგნის მაღაზია
„სორაპანი“ მაღათოვის კენძული. ფოსტით ფული და წე-
რილები უნდა გამოიგზავნოს ამ ადრესით:

Тифлисть книжный магазинъ „Сорапанъ“ (Мадат-
островъ) Рахиль Каландадзе.

ხელმოწერული წერილები არ დაიბეჭდება. დაუბეჭდავ მცირე
წერილებს და კორესპონდენციებს რედაქცია დიდხანს არ
ინახავს, ინახება ერთი თვით მხოლოდ მოთხრობები და
დიდი წერილები.

მოლაპარაკება რედაქციასთან შეიძლება ყოველ
დღე კვირა-უქმეებს გარდა დილის 11-დან ნაშუად-
ღევის 2 საათამდე.

რედაქცია იმყოფება ვანქის ქუჩაზე № 12, ზემო სართულში

რედაქტორ-გამომცემელი ანთ. გიორგობიანი.